

Jon

Od Anī Tamo Wō Yen

1 ¹Gariya bun Od anī ibodon, Od anī Negur ado dibodon, Od anī Negur. ²Gariya bun ī Negur ado dibodon.

³Ī bunem ereb ereb ganan inon, Od anī sã bun ereb inodin taka to ibodok. ⁴Mata ī bun ibodon, mata anī tamo neid fula fiya. ⁵Fula fiya anī gugum bun lalan ifenek, anī ere, gugum ī fula fiya anī to kelein.

⁶Tamo taka Negurem sur fe di, isin, ī yana Jon. ⁷Ī fula fiya anī yaor fe, kurō fesiyouf nigin isin, are tamo kayau ganan ī bunem momoi douf nigin age fen. ⁸Ī anī fula fiya sã, ī fula fiya anī kurō fesiyouf nigin isin.

⁹Fula fiya bagai yogo tamo kayau ganan lalan ifenēdif, ī tenebur isin.

¹⁰Ī teneub bun ibodon, are ī bunem teneub inon, anī ere, tamo kayau tenebur ein, ī to kelein. ¹¹Ī yogon bagai anidi bun isin, anī ere, yogon bagai anidi ī to daleyen. ¹²Anī ere, idi ī daleyen, ī yana nigin momoi den anidi bun, Negur idi Negur nē gere tar wowā douf nigin igirnēdin. ¹³Sina tama nē naud bunem to Negur gere tar wowā den, bouwa nē oroya bunem sã, tamo nē wau irōya buneg sã, anī ere, Negur yogo age fe di, wowā den.

¹⁴Od anī tamo wō ye fen, ada atun ibodon. Ada yogon fula fiya medeīya tailen, fula fiya medeīya are Naal Tekelei Yogo Dogol nē, ī Tama bun tamal wau ifenēya ado momoi barikā isin.

¹⁵Jon ī nigin kurō falaisi wogō yen. Ī iweig fen, iron, “Ī enei nigin aya arokenein, ‘Taka ī aya dumeun isif, ī aya wal fiyaya, ere nigin, ī ket ibodon.’”

¹⁶In wau ifenēya barikā bunem, ada adok el fiya tale fen, anī teten el fiya musei talen. ¹⁷Are Moses bunem lo anī talen, anī ere, wau ifenēya ado momoi anī, Jesus Kristus bunem isin. ¹⁸Taka nem Negur to bagai ilen, anī ere, Negur Naal Tekelei Yogo Dogol, ī Tama wagen ibod ken, ī nigin yaor fen.

Jon Naan Igunēdiya Tamo Ī Yogo Nigin, Aya Kristus Sã, Yen (Matyu 3:1-12; Mak 1:1-8; Luk 3:1-18)

¹⁹Juda tamo Jerusalem temeleid idim, pris tunī, Lewi nē ibor geid sur difedi di, Jon ī aim yeya anī to difiyē di, Jon ī eig ye kurō fesin. ²⁰Ī wa fiya sã, kurō falaisi, “Aya Kristus sã,” yen.

21 Idi ī to difiyen, “Age fiyauf are, ō ai? Ō Eliya de?”

Ī iron, “Aya ī sā.”

Idi diron, “Ō Profet amā tari mafef anim de?”

Ī iron, “Sā.”

22 Age ye di, idi diron, “Ō ai bagai? Ō amā urokanamā len, idi amā sur difaman anidi gein ke ma malauf. Ō ogo nigin ere wof?”

23 Jon profet Asaia nē od bun solof iron, “Aya anī, ait taka gerere tuan iweig irok, ‘Odug nē naab madur gouf.’”^a

24 Farisia tamo tunī sur difedin anidim 25 to difiyen, “Ō Kristus sāf, Eliya sāf, Profet anī sāf are, ere nigin naan ugunēdif?”

26 Jon aitedin yale iron, “Aya naan nem naan agunēdif, anī ere, ā atun, taka ā keleī sā anī ifaref. 27 Ī anī aya dumeun dō fiyaf, aya to biya nigin, in ye su nē malū biru fediya kisi feleya sā.”

28 Enei ganan Betani oun Jordan naan sitakā, Jon naan igunēdin nē an wō yen.

Jesus, Negur Nē Sipsip Naal

29 Naa taka di, Jon, Jesus wagen iyok isi mog, ile fen, iron, “Ulegef, Negur nē Sipsip Naal, ī tamo ganan neid mosor yalededif! 30 Enei nigin au fen, oron, ‘Taka ī aya dumeun isif, ī aya wal fiyaya, ere nigin, ī ket ibodon.’ 31 Aya yug ī keleī san, anī ere, aya asi, naan nem naan agunēdif nē gariya are, Israel tamo kayau bun ī yaor foug nigin.”

32 Age ye fen, Jon enei kurō feis iron, “Aya, Awa Uur saa ilun tamal kuburir gen isi, ī bun ibod mog, ailen. 33 Aya ī to kelein, anī ere, taka ī, aya naan nem naan agunēdiyof nigin sur fiyan im irokanan, ‘Tamo anī, Awa Uur isi, ī bun ibod mog, ulouf, im Awa Uur Fateul nem naan igunēdiyof.’ 34 Aya ailen nigin kurō afeis, ‘Eī Negur Naal,’ auf.”

Jesus In Dō Fiya Tar Uyulil Iweignēdin

35 Naa taka di, Jon, in dō fiya tar uru geid, baban an difaren. 36 Ī, Jesus isi ile di, ile fen, ī iron, “Ulegef, Negur nē Sipsip Naal!”

37 Sain Jon nē dō fiya tar uru enei karī de fen, idi Jesus dō difiyen.

38 Jesus falei yel, idi ī dō difiyē mog, ile fen, to fedin, “Ā ere oroyeik?”

Idi diron, “Rabi (anī nē gariya, Tise), ō nain ubodōdig?”

39 Ī iron, “Umag fen, ulougouf.”

Age ye di, idi dile, ī ibodōdig anī dile fen, naa anī bun, ī geid dibodon. Are aragau fo kilok age fiya.

40 Endru, Simon Pita ne tura ī, idi uruwom ereb Jon wogō yen anī karī de fen, Jesus dō difiyen anī taka. 41 Ereb uruwa Endru age fen are, ī tura Simon imir ile fen, irokenen, “Amā Mesia (anī Kristus) fotou mafen.”

42 Age ye fen, Endru, Pita Jesus wagen irou ile di,

^a 1:23 Asaia 40:3

Jesus Pita lo fiye ken, iron, “Ō Simon, Jon naal. Ō yanā Sifas douf” (Sifas falei fiyauf are, Pita).

Jesus Filip Nataniel Ado Iweignēdin

⁴³Naa taka di, Jesus Galili ileyā nigin kisif fen, Jesus Filip fotou fiye ken, irokenen, “Aya dō wiya.”

⁴⁴Filip ī, Endru Pita ado geid, Betsaida taun temeleid. ⁴⁵Filip Nataniel fotou fiye ken, ī irokenen, “Amā ī nigin Moses nē Lo bun itoton ado profet idig ditoton, Jesus Nasaret tamal, Josef naal anī, fotou mafen.”

⁴⁶Nataniel to fen, “Nasaret! Ereb biya taka, anenem wōya nigin kisi feleya de?”

Filip iron, “Usi ule.”

⁴⁷Sain Jesus Nataniel non iyok isi mog, ile fen, ī nigin iron, “Eī Israel tamo bagai, ī bun erēb idegēya taka sā.”

⁴⁸Nataniel Jesus to fiyen, “Naig wo fen, ō aya keleī?”

Jesus aiten yale iron, “Aya ō Filip iweignōya sā mog, aa fig farumen ubod mog, ailiyon.”

⁴⁹Age ye di, Nataniel Jesus irokenen, “Rabi, ō Negur Naal, ō Israel neid King.”

⁵⁰Jesus iron, “Aya ō aa fig farumen ailiyon aul nigin, ō momoi wof. Ō anī wal fiya erēb erēb odug ulouf.” ⁵¹Ī tobol fe iron, “Aya ā momoi bagai arokeneik, ā, saa bobog kā fele di, Negur nē engel Tamo Naal bun diselef disif dife mog, ulougouf.”

Jesus Irō Di, Naan Wain Falei Felen

2 ¹Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon. ²Jesus in dō fiya tar geid idig, tamo kayau ado bagu fiya bun diweignēdin. ³Sain wain sa kele di, sinam Jesus irokenen, “Idi wain taka sā.”

⁴Jesus iron, “Kayau, ō ere nigin aya kababal wiyaf? Neu sain fau isiya sā.”

⁵Jesus sina, kabī tamo irokenēdin, “Ereb ī irokeneif anī dōg, ago gouf.”

⁶Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

⁷Jesus kabī tamo irokenēdin, “Gulub bun naan utinēdig.” Age ye di, idi ditineid eweid gere fesedin.

⁸Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen. ⁹Sifa marau naan wain falei fen anī yō ilen. Ī wain anī nainenem be isin anī to kelein, anī ere, kabī tamo naan lolob difen idi kelein. Agef fen, sifa marau ī, kayau marau yerin iweignē, ile

di, ¹⁰irokenen, “Ganan idi wain biya anī ket dirousi di, tamo disif idi anī fatuk dō mog, to biya gen anī dum dirousidig, anī ere, ō biya bagai urou ubodom anī, gama bagai urousif.”

¹¹Jesus memelik gariya inon are enei bun, oun Galili distrik Kana fonō. Anī bun, ī yogon fula fiya medeīya yaor fe di, yogon dō fiya tar dogo neid momoiya ī bun dinon.

Jesus Tempel Wāi Fen

(*Matyu 21:12, 13; Mak 11:15-17; Luk 19:45, 46*)

¹²Enei bure fele di, Jesus ī, sina, tura tar ado, yogon dō diya tar geid, Kapenaum disilen. An naa musei to dibodon.

¹³Juda neid Pasa naa sain melsā mog, Jesus Jerusalem iselen. ¹⁴Tempel modoū bun, tamo, bulmakau, sipsip ado, kuburir na sur difeid fen, tunīg tebol bun dibod ken, moni solo de mog, iledin. ¹⁵Anī ile fen, ī malū nem wip inon, agef fen, tempel modoū bun tamal, sipsip ado bulmakau ganan irudi di, serē dilelen, ī moni solo fiya tamo neid koin moni daūf firagagaū fe fen, ī dogo neid tebol yale, falei feledin. ¹⁶Idi kuburir na sur difen anī irokenēdin, “Eneidi ein waleledig, neu Dei nē fō anī maket modoū to unog!”

¹⁷Dum in dō fiya tar, eig ye itotoya anī nigin wedereid fokō yen, “Ogon fō nigin wau itenēya anim nameun isainaf.”^b

¹⁸Age ye di, Juda tamo Jesus dirokenen, “Ere memelik anī ufelnamā di, enei ganan agof anī nigin ō igiriya ado mauf?”

¹⁹Jesus idi irokenēdin, “Tempel enei narī weleg len, naa towo bun baban alesauf.”

²⁰Juda tamo diron, “Tempel enei dinon are, foti-sigis yar yalen, anī ō naa towo bun walesauf de?” ²¹Anī ere, tempel ī wogō yen are, yogo bouwa nigin. ²²Ī laa bunem kel fā yen anī bure fele di, in dō fiya tar, ī iron anī, wedereid fokō yen. Anī bunem, idi Negur nē Itotoya ado Jesus wogō yen anī nigin momoi den.

²³Gama ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den. ²⁴Anī ere, Jesus ī yogo bagai, idi nigin to momoi yen, ere nigin, ī tamo ganan nigin keleī. ²⁵Jesus ī, tamo takam taka nigin ī irokenēya anī kisi feleya san, ere nigin, ereb tamo name bun ibodok, ī yogo keleī.

Jesus Nikodemus Ifelnen

3 ¹Farisia tamo taka, yana Nikodemus ibodon, ī Juda uyu irouya neid kaunsel taka. ²Ī bō Jesus wagen isi fen, iron, “Rabi, amā keleī, ō tise Negur bunem usin. Ere nigin, taka nem Negur ī ado to ibodōf are, memelik ō unodif anī inodiya kisi feleya sā.”

^b 2:17 Sam 69:9

³Jesus aiten yale iron, “Aya ò momoi bagai arokonok, taka nem Negur nē tano to ilouf, ī baban mata gō fiyēf dogol.”

⁴Nikodemus Jesus to fiyen, “Tamo ī biyan anī, sina naig fe baban gō foug? Momoi bagai, ī sina namen baban ile di, gō fiyēya kisi feleya sã!”

⁵Jesus solof iron, “Aya ò momoi bagai arokonok, taka ī, naan ado Awa Uurem mata to wō youf are, ī Negur nē tano bun ileyā kisi feleya sã. ⁶Bouwam gō fef are, bouwa nē, anī ere, Awa Uurem gō fef are, uur nē. ⁷Ō neu od eig au wogō auf bun, kisi to gurū wouf, ‘Ā de baban mata wō gouf.’ ⁸Yau in oroya bun isi iledig. Ō ait dogol karī wodig, anī ere, ò nainenem isif be, nain be ilef, to keleī youf. Ganan idi Awa Uurem gogū fedif are, age fiya bagai.”

⁹Nikodemus Jesus to fiyen, “Are naig fe, agef wō youf?”

¹⁰Jesus iron, “Ō Israel neid tise, anī ere, ò enei to keleik de? ¹¹Aya ò momoi bagai arokonok, ereb amā keleī anī wogō mauf, age ma fen, ereb amā mailen anī kurō mafesif, anī ere, tamo kayau ā fau amā nemā od to walegef. ¹²Aya ā ereb tenebur tamal nē anī wogō ayeik, anī ere, ā to momoi gef, saa ilun tamal nē anī wogō ayeifeg, naig ge momoi gouf? ¹³Aibem taka saa ilun to iselen, Tamo Naal saa ilunem isin yogo dogol. ¹⁴Moses gerere tuan gogour yalesen, age fiya bagai, Tamo Naaleg age de dalesnēf. ¹⁵Are ganan idi ī nigin momoi def, mata faimud ibodkeleya adouf nigin.

¹⁶“Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anī ifenēdin, are taka ī, ī nigin momoi youf are, to fō yalauf, mata faimud ibodkeleya adouf nigin age fen.

¹⁷Negur ī, yogon Naal teneub enei bun, tamo kayau es fediya nigin to sur fen, ī bunem tamo kayau teneub enei bun, kel gei foug nigin sur fen.

¹⁸Taka, ī nigin momoi yef are, to es fiyek, anī ere, taka, ī nigin momoiya sã are, ī mogo es fiya bun ifaref, ere nigin, ī Negur Naal tekelei bagai yana nigin to momoi yen. ¹⁹Foi fiya eig fiya, fula fiya teneub enei bun mogo isin, anī ere, tamo idi dogo neid tobonuneid sane nigin, fula fiya ditor ken, gugum nigin waud laa fen.

²⁰Tamo idi sane age difef are, lalan to orodidig, ere nigin, dogo neid tobonuneid sane anī yaoreya kumī de fen, lalan namen to disiyouf. ²¹Anī ere, aib taka ī momoi bun age fef, lalan namen isidig, age fe di, ereb ī age fen are, Negur bunem age fen anī, yaor dilouf.”

Jon Naan Igunēdiya Tamo, Jesus Nigin Kurō Fesin

²²Anī bure fele di, Jesus in dō fiya tar geid, Judia teneub bun dilen, an ī idi geid sain naal dibod ken, naan igunēdin. ²³Joneg Ainon Salim non naan igunēdin, ere nigin, an naan musei bagai, anī nigin, tamo kayau naan igunēdiyof nigin toku disidig. ²⁴(Are Jon fau kalabus bun to dinenē mog.) ²⁵Jon nē dō fiya tar tunī, Juda tamo taka geid, dogo neid

tobonuneid dō de fen, imeid kulo difedig anī nigin luwa diroun. ²⁶Idi Jon wagen disi dirokenen, “Rabi, tamo ō uruwom Jordan naan sitakā ufareg fen, ī nigin kurō weis uron, ī naan igunēdif, age fe di, ganan ī bun dilef.”

²⁷Jon solof iron, “Tamo ī, ereb saa ilun tamal ifenek anī dogol yalouf. ²⁸Ā aug aya oron anī sã kurō walaisi gef, ‘Aya Kristus sã, anī ere, aya ī ket sur fiyan.’ ²⁹Mois kayau are, mois tamo nē. Mois nē mou ī, bagu fiya bun ifar fen, karī fiyek, ī mois tamo nē ait anī karī ye fen, kulīya odug ado. Kulīya are neu, anī gama kisi felef. ³⁰Ī yana odug iseles di, aya yanau tenebur isilouf.

³¹“Taka ī ilunem isif, ī ganan wal fiya, taka ī tenebur tamal are, tenebur nē, anī nigin, tenebur nē anī wogō yedig. Taka ī saa ilunem isif, ī ganan wal fiya. ³²Ereb ī ilen ado karī yen anī, kurō falaisif, anī ere, yogon od taka nem to yalef. ³³Taka ī yogon od yalen anim, Negur ī momoi bagai ye fen, anī megeir ifenen. ³⁴Taka ī Negurem sur fiyen are, ī Negur nē od wogō yef, ere nigin, Negur ī Awa Uur idikeleya sã ifenek. ³⁵Tama ī Naal nigin wau laaf fen, ereb ereb ganan ī ima bun inon. ³⁶Aib ī Naal nigin momoi yef are, mata gai ibodkeleya ado, taka ī Naal nigin itorok are, ī mata to ilouf, Negur nē didi ī bun ibodok.”

Jesus Samaria Kayau Ado Wogō Den

4 ¹Jesus Jon wal fiye ken, in dō fiya tar musei geif naan igunēdif ya anī, Farisia tamo karī den. ²Anī ere, momoi bagai Jesusem naan igunēdiya sã, are in dō fiya tar anidim. ³Sain Odug enei kelei ken, ī Judia distrik itor ken, baban Galili kel ilen.

⁴Gama ī Samaria atu ilouf. ⁵Anī nigin, ī Sikar taun oun Samaria, Jakop, ne naal Josef teneub kulu ifenen non, iyok isin. ⁶An Jakop nē naan ifotokon tutuwō ibodon, Jesus naab meluk iyok isi, tuwa yu keles di, naan ifotokon tutuwō sirin ibodon. Are mogo gaa atun age fiya.

⁷Agef mog, Samaria kayau taka naan ifotūya nigin isi di, Jesus kayau irokenen, “Aya naan tau wana di, āf.” ⁸(In dō fiya tar, taun saaf na yaleya nigin dilelen.)

⁹Samaria kayau Jesus irokenen, “Ō Juda tamo di, aya Samaria kayau. Naig fe di, ayam ō naan afon, wāf nigin to wiyaf?” (Juda tamo kayau idi, Samaria tamo kayau geid to uyu katō difedig.)

¹⁰Jesus kayau irokenen, “Ō safina ege luwa Negur ifonok ado, aibem naan nigin to yok anī keleim are, ō ī to wiyē di, mata ifenēya nē naan anī ifonom.”

¹¹Kayau iron, “Odug, ō ifotūya nē safina sã, naan ī ilon bagai. Ō mata ifenēya nē naan are nain walouf? ¹²Tamamā Jakop naan ifotok kanama ken, ī yogog gere tar ado gaareg anī bun don, ō ī wal fiya de?”

¹³Jesus kayau aiten yale iron, “Ganan naan enei doko, idi baban naan ail fediyouf. ¹⁴Anī ere, taka ī aya naan anī afenē di, yoko, ī baban to

bagai naan ail fouf. Naan aya ĩ afenek, warur naan ĩ namen faimud ulo ulō yef yenē di, anim mata gai ibodklauf.”

¹⁵Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotūya nigin toku ein to klauf.”

¹⁶Ī kayau irokenen, “Ule, ogon tamo uroken ken, kel usig.”

¹⁷Kayau iron, “Aya tamo sã.”

Jesus kayau irokenen, “Ō tamo sã wof are, ō tutuk urok. ¹⁸Ere nigin, ō mogo tamo faif adon, tamo gama ō ado are, ogon aiwã sã. Ō ogo urom, are momoi bagai.”

¹⁹Kayau iron, “Odug, aya ō ailiyok, ō profet taka. ²⁰Amã tamamã tar, arei enei bun Negur yana dalesedig, anī ere, Juda ã urōgedig, Negur yana yaleseya modoū are oun Jerusalem dogol.”

²¹Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf. ²²Samaria ã, ereb ã keleī sã anī yana walesegedig, amã ereb amã keleī anī yana malesedig, ere nigin, tamo kayau kel yaleya nē are, Juda ibor bun tamal. ²³Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anī Dei ĩ imirnedif. ²⁴Negur ĩ uur, anī nigin, ĩ yana dalesedig idi, uur ado momoi bunem, yana dalesauf.”

²⁵Kayau iron, “Aya keleī, Mesia (Kristus dedig) fau isif. Ī isiyouf sain bun, ereb ereb ganan fated famãf.”

²⁶Age ye di, Jesus kayau irokenen, “Aya inim yeir od ayok.”

Jesus Nē Dō Fiya Tar Keku De Disi, Jesus Geiden

²⁷Agef mog bagai, in dō fiya tar keku de disī, Jesus kayau anī ado od de mog, dileid fen, terē den. Anī ere, taka nem to, to fiyen, “Ō ere oroyok?” be “Ō ere nigin ĩ ado od gef?”

²⁸Kayau, ne naan gulub itor yen, taun kel ile, tamo kayau irokenēdin, ²⁹“Umag, tamo taka, aya ereb ereb ganan age afef asin irokanal anī uleg. Ī anī Kristus be.” ³⁰Idi taun ditor disī, Jesus garan dilen.

³¹Age de mog, in dō fiya tar Jesus total bagai dirokenen, “Rabi, ereb taka wō.”

³²Anī ere, ĩ idi irokenēdin, “Aya saaf ã keleī sã anī ãf nigin ado.”

³³Age ye di, in dō fiya tar abob dirokenen, “Taka nem mogo saaf irousi ifenem de?”

³⁴Jesus iron, “Neu saaf are, aya sur fiyan in oroya dō afe fen, in kabī bure afalauf anī. ³⁵Ā eig ge to urōgedig de, ‘Ōgō fo bure fele di, kusu fiya sain wō youf’? Aya ã arokeneik, meleī fara weleg fen, kabī onoudi ulogouf! Idi mogo kusu fiya nē mayo bure felen. ³⁶Kusu fiya tamo ĩ gama mala solo yalef, ĩ gama mata faimud ibodkeleya nē biya kusus fef, anī bun, itenēya tamo ado kusu fiya tamo waud al fouf. ³⁷Anī nigin, od enei

momoi bagai, ‘Tamo takam itenēdig, tamo takam kusu fedig.’ ³⁸Aya, ā kabī to walegen nē an, kusu fiya nigin sur ayein. Tunim kabī total dalen, anī ā idi neid maab mala anī kusu gen.”

Samaria Tamo Kayau Musei Momoi Den

³⁹Samaria tamo kayau, taun anī bun temeleid musei, ī nigin momoi den, ere nigin, kayau anī eig ye kurō fesin, “Ī ereb ereb ganan age afef asin anī irokanal.” ⁴⁰Anī nigin, Samaria tamo kayau ī gein disi, ī idi geid dibodōf nigin total bagai dirokenē di, ī naa uru, idi geid dibodon. ⁴¹In od bunem, musei fau fau momoi den.

⁴²Idi kayau anī dirokenen, “Amā ogon od bun dogol to momoi mauf, ere nigin, amā mug karī mau fen, amā keleī, tamo enei momoi bagai teneub ganan enei nē Isennēya.”

Jesus, King Nē Kabī Mudur Naal El Fiyen

⁴³Naa uru bure fele di, Jesus Galili ilen. ⁴⁴Jesus ī yogo iron, ‘Profet taka, yogon fō gariyan, ī yana sā.’ ⁴⁵Sain ī Galili wō yen, Galili tamo kayau ī daleyen. Idi Jerusalem Pasa Sifa bun, ī ereb ereb age fen ganan dilen, ere nigin, idig an weim difaren.

⁴⁶Ī baban Galili distrik oun Kana fonō ki fen, kulu an ī naan wain falei felen. Sain anī bun, king nē kabī mudur taka nē naal Kapenaum taun an dagi yenen. ⁴⁷Tamo enei, Jesus Judia distrik tamal Galili isin anī karī ye fen, ī Jesus gein ile, ne naal laa melsā yenen anī, isi el fiyēf nigin igonen.

⁴⁸Jesus ī irokenen, “Ā memelik uris ado anī to ulogouf are, ā to bagai momoi gouf.”

⁴⁹King nē kabī mudur iron, “Odug, neu kesu fau laa fiya sā mog, ō usiyouf.”

⁵⁰Jesus ī irokenen, “Ō wadā ule. Ō naal fau mata ibodōf.”

Tamo anī, Jesus nē od momoi ye fen, ilen. ⁵¹Ī fau naab iyok ile mog, yogon ferfer ī fotou difiye ken, yogon kesu mata ibodok anī wogō difiyen. ⁵²Age de di, ī gaa mala ganī bun, ne naal dagi karikan anī to fiyēdin. Idi ī dirokenen, “Bouwa uruwa, nor wan kilok aragau folō fiye kelen.”

⁵³Age de di, tama ī kelein, sain anī bun bagai, Jesus irokenen, “Ō naal fau mata ibodōf.” Anī nigin, ī yogo, ne fō tura tar ganan geid, momoi den.

⁵⁴Jesus Judia distrik bun tamalem Galili isi fen, memelik inon, are eneim anī uru.

Jesus Dagi Tamo Betesta Naan Kolili Fiyen El Fiyen

5 ¹Dum, Jesus Juda neid sifa bun Jerusalem iselen. ²Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anī sirin meein torem fō faif dinodin dibodok. ³An dagi tamo kayau musei denenādig, meleid ifofakeleya, yeid kirorōya,

bouweid ilolaisidin.^c ⁵ Difaren nē an, tamo taka dagi ado ibodok ile, teti-eit yar yalen. ⁶ Sain Jesus ī an yen mog, ile fen, ī sain meluk dagi ado an yenen anī kelei ken, ī to fiyen, “Ō biya leya oroyok de?”

⁷ Dagi tamo iron, “Odug, sain naan moyō fe di, taka nem isenna di, naanū isileya to ibodok. Aya asilauf au mog, taka ketem uyu wal fiya fen, isiledig.”

⁸ Age ye di, Jesus ī irokenen, “Fā wo! Ogon gogoū wenēdig anī wale fen, uyok ule.” ⁹ Age ye di, tamo kaisā bagai dagi sa kelei di, ī yogon gogoū yale fen, iyok ilen.

Anī wō yen naa are, Sabat naa. ¹⁰ Anī nigin, Juda tamo idi, tamo dagi sa kelen anī dirokenen, “Naa ē Sabat naa.” ^d Ō ogon gogoū irouya nigin lo katū yef.”

¹¹ Anī ere, ī aitedin yale iron, “Tamo ī el fiyal anim, ‘Ogon gogoū wenēdig anī wale fen, uyok ule,’ fiyal.”

¹² Anī nigin, idi ī to difiyen, “Tamo enei nanim, ‘Ogon gogoū wale fen, uyok ule,’ yom?”

¹³ Tamo el fiyen, ī aib ya anī nene yelen, ere nigin, Jesus ī an guru difen anī namen iwaikelen.

¹⁴ Dum Jesus tamo anī tempel bun fotou fiye ken, irokenen, “Ulef, ō baban biya lel. Baban mosor to uno, are ereb sane bagai uruwa nē wal fiya anī, ō bun to wō youf nigin.” ¹⁵ Tamo are ile, Juda tamo irokenēdin, ‘Aya el fiyal tamo are Jesus,’ yen.

Negur Naal Bunem Mata Ibodōya

¹⁶ Jesus Sabat naa bun enei age fedig nigin, Juda tamo idi ī morō difenen. ¹⁷ Jesus idi irokenēdin, “Neu Dei ī faimud kabī yalef isi, gama naa enei buneg kabī yalef, anī nigin, ayag kabī alef.” ¹⁸ Jesus age yen nigin, Juda tamo idi ī dukesiyouf nigin kabī total dalen, Sabat naa nē lo wal fiya bun nigin dogol sā, ī Negur nigineg neu Dei ye fen, aya Negur ado tekelei yen nigin.

¹⁹ Anī nigin, Jesus od enei idi irokenēdin, “Aya ā momoi bagai arokeneik, Naal ī yogon oroyam ereb taka to age foug, ī Tama age fef anī dogol ile fen, īg age fedig, ere nigin, ereb Tama age fef are Naaleg age foug. ²⁰ Tama ī Naal nigin wau laaf fen, ī ereb ereb age fedig anī ganan ifelnek. Ī ereb ereb enei wal fiya Naal ifelnēf, anī bun ā terē gouf. ²¹ Tama ī laa turī feid fen, mata ifenēdidig, age fiya bagai, Naal īg aib ī orof anī mata ifenēdig. ²² Tama ī aib taka to es fiyēf, anī ere, ī es fiya kabī ganan Naal bun inon, ²³ are tamo kayau ganan idi Temeid yana dalesedig gen,

^c 5:3 Itotoya tunī eig de ditoton: *ilolaisidin. Idi naan moyō foug nigin tari difedig.* ⁴ Sain taka taka Odug nē engel taka isi, naan moyō fedig. Taka ī moyō mugu mugu ile fen, ī ket naanū isilef, ī ereb dagi ado are el feledig. ^d 5:10 Sabat naa anī, Juda neid uub nē naa.

Naal nigineg yana dalesauf nigin ĩ age fen. Taka ĩ Naal yana to yalesef, ĩ Tamam Naal sur fiyen anĭ yana to yalesef.

²⁴“Aya ā momoi bagai arokeneik, taka ĩ neu od karĭ ye fen, aya sur fiyan ĩ nigin momoi yef, ĩ mata faimud ibodkeleya ado fen, es fiya bun to ilauf. ĩ laa bun tamal ibal fen, mata bun ilen. ²⁵Aya ā momoi bagai arokeneik, sain fau isif, are mogo yeir isil, laa tamo Negur Naal nē ait karĭ douf, idi karĭ def anidi mata dibodōf. ²⁶Tama ĩ yogo bun mata ado, age fiya bagai, ĩ mata de anĭ Naaleg adouf nigin ifenen. ²⁷Agef fen, Tama ĩ Naal es fediyouf nigin megeir ifenen, ere nigin, ĩ Tamo Naal.

²⁸“Eig fiya bun to terē gouf, sain fau isif, ganan nedi matmat bun dibodok idi, yogon ait karĭ de fen, ²⁹ulolō desiyouf, idi biya age difen anidi mata dibodōf nigin fafā douf, idi sane age difen anidi es fedĭ di, hel bun dilauf nigin fafā douf. ³⁰Aya neu oroyam, ereb taka to naig be afouf. Aya karĭ auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anĭ ere, aya sur fiyan ĩ wau al foug nigin au fen, age afedig.

Jesus Yogo Nigin Kurō Fesin

³¹“Aya yug nigin aya mugu wogō auf are, neu wogōya are, momoi be sā be anĭ yaor sā. ³²Taka ĩ aya nigin kurō fesidig, agef fen, aya keleĭ, ĩ aya nigin kurō fesif are momoi.

³³“Ā Jon garan tamo tunĭ sur wedige di, ĩ aya nigin momoi od anĭ kurō falaisi irokenēdin. ³⁴Aya tamom aya nigin kurō fesif anĭ to aroudig, anĭ ere, aya ā isenneĭf au fen, od anĭ wogō aun. ³⁵Jon ĩ lam futur fen, lalan ifenen, age fe di, ā sain tobega bagai waleg fen, in lalan nigin wauĭ al fen.

³⁶“Neu kurō fesiya anĭ Jon nē wal fiya, ere nigin, kabĭ aya bure afalauf nigin Dei ifanan alef anim, Dei ĩ aya sur fiyan anĭ kurō fesif. ³⁷Dei ĩ sur fiyan ĩ yogo, aya nigin kurō fesin. Ā ĩ ait to karĭ gen, nog to ulegen, ³⁸in odeg ā bun to ibodok, ere nigin, ā sur fiyen anĭ ĩ nigin to momoi gedig. ³⁹Ā Negur nē Itotoya keleĭ youf nigin kabĭ total walegedig, ere nigin, ā kisi gef, anĭ bunem amā mata faimud ibodkeleya malef ge fen, ago gedig. Negur nē Itotoya enei, aya nigin kurō fesif. ⁴⁰Anĭ ere, ā mata yaleya nigin, aya wageun isiya utorōgedig.

⁴¹“Aya tamom yanau dalesauf nigin to orok, ⁴²anĭ ere, aya ā nigin keleĭ. Aya keleĭ, ā wauĭ bun Negur nigin wauĭ laa fiya to ibodok. ⁴³Aya neu Dei yana bunem asin, anĭ ā aya to waleyagen, anĭ ere, aibem taka yogo yana bunem isif are, ā walougouf. ⁴⁴Ā abob yana yaleseya anĭ oroyei ken, yana yaleseya Negur Tekelei bunem isif anĭ to total unog walougouf are, ā naig ge momoi gouf?

⁴⁵“Anĭ ere, ā ayam Dei mala bun āgenei sane anĭ kurō afesiyouf ge fen to kisig. Āgenei sane kurō fesiya are Moses, ĩ bun āgenei wauĭ iseya unogedig anĭ. ⁴⁶Ā Moses nigin momoi gem are, aya nigineg momoi gem,

ere nigin, im aya nigin itoton. ⁴⁷Anĩ ere, ereb ĩ itoton anĩ to momoi gef nigin, naig ge fen, aya wogō auf enei nigineg momoi gouf?”

Jesus Faif Tausen Tamo Saaf Ifenēdin
(*Matyu 14:13-21; Mak 6:30-44; Luk 9:10-17*)

6 ¹Enei dumen, Jesus Galili Maaĩ ub sitakā ibal ilen (Galili Maaĩ anĩ, yana taka Taiberias Maaĩ). ²Age fe di, tamo kayau musei ĩ dō difiyen, ere nigin, ĩ dagi tamo kayau bun memelik ino di, meledim dilen. ³Agef fen, Jesus arein isel, yogon dō fiya tar geid dibodon. ⁴Juda neid sifa inoya Pasa naa melsā mog.

⁵Sain Jesus mala irakel, tamo kayau musei ĩ garan disi mog, ileid fen, ĩ Filip irokenen, “Ada tamo kayau eneidi dāf nigin, bret nain na talouf?” ⁶Ī Filip kisi fiye ken, enei to fen, ere nigin, Jesus ĩ ereb age foug nigin are ĩ kelei.

⁷Filip Jesus aiten yalen, “Ogō eit nē mala anim, idi mugu mugu nigin bret na talouf are, tunĩ to dō dilouf.”

⁸In dō fiya tamo taka Endru, Simon Pita nē tura anĩ Jesus irokenen, ⁹“Kesu taka yeir baali bret faif gau uru ado, anim musei ganan enei tau kisi falauf?”

¹⁰Jesus iron, “Tamo kayau urokenēdig len, dibod.” Modoũ anĩ bun fisir musei ado, an tamo dibodadan faif tausent age fiya. ¹¹Gama Jesus bret anĩ geif, Negur de fiye ken, idi dibodadan neid oroya kilei, anĩ gadō fedin. Ī gau buneg de age fen.

¹²Idi ganan dō kisi fele di, Jesus in dō fiya tar irokenēdin, “Tunĩ ditoraram anĩ kurug. To sekil fiyauf.” ¹³Anĩ nigin, baali bret faif anĩ idi dokon, masak tunĩ ifaredin anĩ kuru dife di, karam tuwelf isokosedin.

¹⁴Tamo kayau memelik inon anĩ dile fen, idi diron, “Momoi bagai, enei are Profet teneub enei bun isiyouf ya anĩ.” ¹⁵Idi disi, Jesus king ibodōf nigin nugo difiyēf ya anĩ, ĩ kelei ken, baban mugu arein kel iselen.

Jesus Naan Teteatu Iyon
(*Matyu 14:22-33; Mak 6:45-52*)

¹⁶Gugumek isi di, yogon dō fiya tar daliyoun disilen. ¹⁷An idi waag taka bun sosō de daliyou dibal fen, Kapenaum luwe dile mog, mogo gugumen, anĩ Jesus fau idi garan to isin. ¹⁸Yau totol isi di, maaĩ moloun wĩ yen. ¹⁹Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumĩ tererē den. ²⁰Anĩ ere, ĩ idi irokenēdin, “Are ayam, to kumĩ wog.” ²¹Age ye di, ĩ waag bun dalesnēf nigin waud yenen, kaisā bagai, idi dilauf nē waud iron ub anĩ bun, waag goro fen.

²²Naa taka di, tamo kayau daliyou ub sitakā difaren idi kelein, waag tekelei dogol an ibodon, anĩ Jesus in dō fiya tar geid to sō den, idi dogo

dogol dilen. ²³Waag tunī Taiberias temeleid, Odug, bret Negur de fiye ken, tamo kayau ifeneīd don modoū anī non, goro difen. ²⁴Tamo kayau, Jesus in dō fiya tar geid an to dibodon anī kelei ken, idi waag sosō de fen, Jesus dimirnēf nigin Kapenaum dilen.

Jesus Mata Nē Bret

²⁵Sain tamo kayau idi, daliyou sitakā Jesus fotou dife fen, idi ī to difiyen, “Rabi, ere sain ō ein usin?”

²⁶Jesus aitedin yalen, “Aya ā momoi bagai arokeneik, ā aya umirnagef, ā memelik ulegen nigin sā, anī ere, ā bret ifoutneī di, wōg eweī gere fen nigin. ²⁷Saaf sane ledig anī nigin to kabī waleg, anī ere, saaf to sane le fen, mata faimud ibodkeleya bun ibodōdig anī nigin kabī waleg, are Tamo Naalem ifeneīf. Ī dogol Tama Negurem igrine ken, yoya nē megeir ganan ifenen.”

²⁸Age ye di, idi ī to difiyen, “Amā Negur nē kabī malouf nigin, naig bagai mafouf?”

²⁹Jesus solof iron, “Negur nē kabī are yeir, Negurem sur fiyen ī nigin momoi gouf.”

³⁰Anī nigin, idi ī to difiyen, “Ere memelik bun uris wanamā di, mail fen, ō momoi mayōf? Ere anī ō unouf? ³¹Amā nemā tubumā tar gerere tuan mana don, Negur nē Itotoya bun eig ye yenek kilei, ‘Ī idi saa ilun tamal bret dāf nigin ifenēdin.’^e ”

³²Jesus idi irokenēdin, “Aya ā momoi bagai arokeneik, Moses im bret saa ilun tamal to ifenein, anī ere, neu Dei ī yogo bret kaū bagai saa ilun tamal ifeneik. ³³Ere nigin, Negur nē bret saa ilun tamal isi fen, teneub enei mata ifenek.”

³⁴Idi diron, “Odug, gama ilauf enei bun bret anī wanamā.”

³⁵Jesus idi irokenēdin, “Aya anī mata nē bret. Taka ī aya bun isif, to bagai naū ilauf, taka ī aya nigin momoi yef, to bagai naan ail fouf. ³⁶Anī ere, aya ā arokenein kilei, ā mogo uleyagen, anī fau to momoi gef. ³⁷Idi ganan Deim ifanaf, aya bun disiyouf, taka ī aya bun isif, aya to bagai aruwauf. ³⁸Aya saa ilun tamal asin, aya neu oroya dō afouf nigin sā, anī ere, aya sur fiyan nē oroya dō afouf nigin. ³⁹Aya sur fiyan nē oroya are yeir, idi ganan ī ifanan taka to folō afalauf, anī ere, aya idikeleya naa bun alesnēdiyouf. ⁴⁰Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

⁴¹Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.” ⁴²Idi diron, “Eī Jesus sā de? Josef naal, in sina tama ado ada kelei. Naig fe di, ī irok, ‘Aya saa ilun tamal asin’?”

^e 6:31 Eksodas 16:4; Nehemaia 9:15; Sam 78:24, 25

⁴³Jesus solof iron, “Ā aug to nauseir gouf. ⁴⁴Taka yogon oroyam, aya wageun isiya kisi feleya sā, anī ere, Dei aya sur fiyan inim, ī namen kabī yale fen, aya garan irou isiyouf. Age fe di, idikeleya naa bun, aya ī alesnēf. ⁴⁵Profet neid itotoya bun eig ye yenek, ‘Idi ganan Negurem ifelnēdiyof.’^f Taka ī Dei karī fiye ken, ī bun keleī yalef, aya bun isidig. ⁴⁶Taka nem Dei to ilen, Negur bunem isin im dogol. Ī yogo dogol Dei ilen. ⁴⁷Aya ā momoi bagai arokeneik, taka ī momoi yef, mata faimud ibodkeleya ado. ⁴⁸Aya mata nē bret. ⁴⁹Āgenei tubuī tar gerere tuan mana don, anī ere, idi gare den. ⁵⁰Anī ere, bret enei saa ilun tamal isif, are tamo yāf, to laa fouf. ⁵¹Aya mata ibodōya bret, are saa ilun tamalem isin. Taka ī bret enei yoko, ī mata faimud ibodōf. Bret enei aya bouwau, are teneub ganan bun, tamo kayau mata dalouf nigin afenēdiyof.”

⁵²Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tāf?”

⁵³Jesus idi irokenēdin, “Aya ā momoi bagai arokeneik, ā Tamo Naal nē bouwa to wāgauf, in naud to wāgauf are, ā namein mata to ibodok. ⁵⁴Taka ī neu bouwau yokon, neu naudou yoko, ī mata faimud ibodkeleya ado, anī aya fau idikeleya naa bun alesnēf. ⁵⁵Ere nigin, neu bouwau are saaf bagai, neu naudou are naan bagai. ⁵⁶Taka ī neu bouwau yokon, neu naudou yoko, ī aya nameun ibodok, aya ī namen abodok. ⁵⁷Mata ibodōya Dei aya sur fiya di, aya Dei bunem mata abodok gen, taka ī aya yōyaf, aya bunem mata ibodōf. ⁵⁸Bret enei saa ilun tamal isin. Āgenei tubuī tar mana don are gare desin, anī ere, taka ī bret enei yoko, faimud mata ibodkalauf.” ⁵⁹Ī od enei Kapenaum taun an, Juda neid uub fō bun ifelneid fen, wogō yen.

In Dō Fiya Tar Musei Jesus Ditornen

⁶⁰Od enei karī de fen, in dō fiya tar musei diron, “Ifelnadaf eī total bagai. Aim anī keleī youf?”

⁶¹In dō fiya tar od enei nigin nauseir de di, Jesus anī kelei ken, idi irokenēdin, “Od enei ā morō ifeneik de? ⁶²Ba, Tamo Naal ī ibodon nē kel isel mog ulogouf are, ā ere kisi gouf? ⁶³Awa Uurem mata ifenēdig, bouwa are gorō. Od aya wogō ayein are Uur, od anī mata ifenēdig. ⁶⁴Anī ere, ā tunī momoiya sā.” Ere nigin, Jesus idi nigin gariya bun kelein, aiyaim ī nigin to momoi den, aim ī nigin kiwai inouf. ⁶⁵Ī od tobol fe iron, “Anī nigin, aya od enei arokenein, Dei ī nigin wau to yalouf, ī aya bun isiya kisi feleya sā.”

⁶⁶Od enei bunem, in dō fiya tar musei keku den, baban Jesus to dō difiyen.

⁶⁷Jesus in dō fiya tar tuwelf to fedin, “Āg aya utornag ulagauf de?”

^f 6:45 Asaia 54:13

⁶⁸ Simon Pita solof iron, “Oduḡ, amã ai bun malauf? Õ mata faimud ibodkeleya nē od ado. ⁶⁹ Amã momoi mau fen, keleĩ, õ anĩ Negur nē Fateul.”

⁷⁰ Age ye di, Jesus idi irokenēdin, “Tuwelf ã ayam to agirnein de? Anĩ ere, ã atun taka are Satan.” ⁷¹ (Ĩ Judas, Simon Iskariot naal nigin kisif fen, iron. Idi tuwelf anĩ taka Judas, fau dum Jesus kiwai ifenen.)

Jesus Salafat Nē Sifa Bun Ilen

7 ¹ Enei dumen, Jesus Galili an iyon, Judia distrik so fiyen, ere nigin, an Juda tamo ĩ dukesiyouf nigin ololo difen. ² Anĩ ere, Juda neid Salafat nē Sifa naa melsã di, ³ Jesus tura tarem ĩ dirokenen, “Õ ein utorken, Judia ulauf, ago di, oḡon dõ fiya tar, memelik uno di, dilouf. ⁴ Tamo taka ĩ, tamo kayau meleid bun mala yaor wõ you fenē, ĩ iminēyan kabĩ to yaledig. Õ eneidi agof, õ oḡo tamo kayau ganan ufelnēdiyof.” ⁵ ĩ yogon tura tar bagaig, ĩ nigin to momoi den.

⁶ Anĩ nigin, Jesus idi irokenēdin, “Aya neu sain bagai fau isiya sã, ã nigin sain ganan kisi feleya bagai. ⁷ Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig. ⁸ ã Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.” ⁹ Jesus od enei wogõ yel fen, Galili distrik an ibodon.

¹⁰ Anĩ ere, tura tar Sifa bun diselel mog, ĩḡ iselen, anĩ ere, mala yaor sã, iminēyan. ¹¹ Sifa bun, Juda tamo idi, ĩ nigin meleid dino fen, to difen, “Tamo are nain?”

¹² Tamo kayau atun, ĩ nigin fatuk bagai kosesē kurã den. Tunĩ diron, “Ĩ tamo biya.”

Tunĩ solo de diron, “Eo, ĩ tamo kayau ideḡnēdidig.” ¹³ Anĩ ere, taka nem ĩ nigin yaor to kurõ fesin, ere nigin, idi Juda tamo nigin kumĩ den.

Jesus Sifa Bun Ifelnēdin

¹⁴ Sifa mogo atusil ifar mog, Jesus tempel modoũ bun isel fen, od ifelnēdin. ¹⁵ Juda tamo idi terē de fen, diron, “Tamo enei tai fiya yaleya sã mog, naig fe fen, keleĩ eig fiya ado?”

¹⁶ Jesus solof iron, “Neu ifelnēya are neu sã, aya sur fiyan ĩ bunem isif. ¹⁷ Taka ĩ Negur nē oroya dõ fiya nigin orof are, neu ifelnēya Negur bunem isif be, aya neu oroya nem wogõ auf be anĩ, ĩ keleĩ youf. ¹⁸ Taka ĩ yogon kisim wogõ yef are, ĩ yogo yana yaleseya nigin age fef, anĩ ere, taka ĩ sur fiyen nē yana yaleseya nigin kabĩ yalef, tamo are momoi nē. ĩ bun ideḡya taka sã. ¹⁹ Moses lo anĩ to ifenein de? Anĩ ere, ã atun, taka nem lo to dõ fedig. Ere nigin ã aya unakesigouf nigin ago gef?”

²⁰ Tamo kayau solo de diron, “Õ kaa sane ado. Aim õ inokesiyouf nigin age fef?”

²¹ Jesus idi irokenēdin, “Aya memelik taka ano di, ā ganan terē gen. ²² Anī ere, Mosesem mulū ileyā ifenein nigin, ā kesu Sabat naa bun mulū ileyā wenēgedig (mulū ileyā are, Moses bunem to isin, teneub te bunem isin). ²³ Moses nē lo to wal gouf nigin, Sabat naa bun kesu nē mulū ileyā wenēgedig, ere nigin aya Sabat naa bun, tamo bou adok el afe di, ā aya nigin nameī sanedig? ²⁴ Mala yaor anī dogol uleg fen, to es gei, tutuk bagai el ge, es gei.”

Jesus Anī Kristus De?

²⁵ Sain anī bun, Jerusalem tamo kayau tunī diron, “Tamo enei are idi ī dukesyouf nigin age difef anī sā de? ²⁶ Ī de yeir, mal atun wogō ye di, ereb od taka to dirokenek. Mudur adodo idi, ī anī Kristus ya anī mogo tutuk keleī de? ²⁷ Anī ere, tamo enei nain be tamal, are amā keleī. Sain Kristus isiyouf, taka nem ī nainenem be isif to keleī youf.”

²⁸ Age de di, Jesus fau tempel modoū bun ifelneid fen, iweig iron, “Are de, ā aya nigin keleī, aya nainenem asin are ā keleī. Aya ein neu oroyam to asin, anī ere, ī aya sur fiyan are momoi. Ā ī keleī sā, ²⁹ anī ere, aya ī keleī, ere nigin, aya ī bun tamal, im aya sur fiyan.”

³⁰ Od enei bun, idi ī dirounēf nigin age difen, anī ere, taka nem ī bun ima to inon, ere nigin, yogon sain fau isiya sā. ³¹ Anī ere, tamo kayau musei fau ī nigin momoi de fen, diron, “Sain Kristus isiyouf, ī memelik tamo enei inodif anī wal fiya inodiyouf de?”

³² Tamo kayau ī nigin age de, kosesē kurā de mog, Farisia tamo idi karī den. Age de fen, pris odudug Farisia geid, tempel lo fiya tamo Jesus dalouf nigin sur difedin.

³³ Jesus iron, “Aya ā geid sain modeg tabodok, age afe fen, aya ī aya sur fiyan bun alauf. ³⁴ Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sā.”

³⁵ Juda tamo abob dirokenen, “Tamo enei nari bagai ile di, anī ada ī to fotou tafouf? Ada neda tamo kayau firagagaū difen, Grik tamo kayau atun dibodok nē an, ī ile fen, Grik tamo kayau ifelnēdiyof de? ³⁶ Ere gariya nigin ī iron, ‘Ā aya umirnagauf, anī ere, ā to fotou wiyagauf. Aya abodōf nē an, ā isiya kisi feleya sā?’”

³⁷ Sifa naa odug idikeleya bun, Jesus ifar fen, iweig iron, “Taka ī naan ail fouf, aya bun isi fen, naan yāf. ³⁸ Taka ī aya nigin momoi yef, Negur nē Itotoya iron kilei, warur naan ī namenem ulō ulō yef yenēf.” ³⁹ Ī od enei Awa Uur nigin wogō yen, are idi Jesus nigin momoi den anidi fau dalouf. Sain anī bun, Awa Uur isiya san, ere nigin, Jesus fau fula fiya medeīya yaleya sā.

⁴⁰ Od enei karī de fen, tamo kayau tunī diron, “Momoi bagai, tamo enei Profet ada tari tafef anī.”

⁴¹ Tunī diron, “Ī Kristus.”

Tunīg diron, “Kristus ouf are, naig fe fen, Galilim isiyouf? ⁴²Kristus Dawid nē ibor bunem, Betlehem taun Dawid ibodon nē anenem isiyouf, anī Negur nē Itotoya to irok de?” ⁴³Anī nigin, tamo kayau Jesus nigin fara furu difen. ⁴⁴Tunī Jesus ka difiyēf nigin age difen, anī ere, taka nem ī bun ima to inon.

Juda Neid Mudur Adodo Momoiya Sā

⁴⁵Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ā ī to urou usigel?”

⁴⁶Tempel lo fiya tamo solo de diron, “Taka nem, tamo enei wogō yedig gen to wogō yedig.”

⁴⁷Farisia tamo solo de diron, “Ī āg idegnein de? ⁴⁸Mudur adodo Farisia tamo geid atun, taka ī nigin momoi yen de? ⁴⁹Sā, anī ere, tamo kayau eneidi idi lo keleī sā, idi Negurem gelu fedif.”

⁵⁰Nikodemus, idi neid taka, tetunem Jesus garan ilen, ī irokenēdin, ⁵¹“Ada neda lo bun, taka ī ereb age fef anī ileyā nigin ketem karī tafiyē ken, es tafedig. Age fiya sā de?”

⁵²Idi solo de diron, “Ōg Galili tamal de? Umir ken, fau keleī youf, profet taka Galilim to isif.”

[Itotoya tunī kulu bagai od gariya dino fen, ditoton anī bun, Jon 7:53–8:11 to ibodok.]

⁵³Age de fen, idi mugu mugu dogo neid fonō fonō dilen.

8 ¹Anī ere, Jesus Moul Arei bun iselen. ²Bonimeim mumurei ado, ī baban tempel modoū bun wō yen, an tamo kayau ganān guru de salili difiyē di, ī ifelnēdiyof nigin ibodon. ³Lo ifelnēdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenē di, ifaren. ⁴Age dife fen, Jesus dirokenen, “Tise, kayau enei noli tobonunā ino di, malel. ⁵Lo bun, kayau age fediya meein tulu fiya nigin Moses irokanaman. Gama ō ere wof?” ⁶Idi ī bou bun od yūya nigin kor dino fen, age de, to difiyen.

Anī ere, Jesus obū yeis fen, ima gegem teneub bun itoton. ⁷Idi ī to difiyētu di, ī fā ye, saules fen, irokenēdin, “Ā atun, aib taka ī mosor sāf, ī ketem kayau bun meein irāf.” ⁸Baban ī obū yeis fen, teneub bun itoton.

⁹Idi od anī karī de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anī ado dogol ditornēdin. ¹⁰Jesus saules fen, kayau to fiyen, “Kayau, idi nai difef? Idi takam baban ō bun od to yuk de?”

¹¹Kayau iron, “Odug, takam to age fef.”

Jesus iron, “Ayag ō boū bun od to auk. Ule fen, sain enei ilauf ganān, mosor baban to uno.”

Jesus Nē Wogōya Are Momoi

¹²Jesus baban tamo kayau irokeneīd fen, ī iron, “Aya tenebur enei nē fula fiya. Taka ī aya dō fiyauf, ī gugum namen to bagai iyōf, anī ere, ī mata nē fula fiya adouf.”

¹³Age ye di, Farisia tamo idi Jesus dirokenen, “Õ ogo nigin wogõ wof, anĩ nigin, ogon wogõya are, momoi be sã be anĩ yaor sã.”

¹⁴Jesus solof irokenēdin, “Aya yug nigin wogõ auf, anĩ ere, neu wogõya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã. ¹⁵Ã tamo nẽ tobonunã bunem es gedig, aya aib taka to es afedig. ¹⁶Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref. ¹⁷Ãgenei Lo bun itotoya irok, tamo urom wogõ tekelei dinof, are momoi. ¹⁸Aya yug nigin kurõ afalaisidig, age afe di, Dei aya sur fiyan ĩ, aya nigin kurõ fesidig.”

¹⁹Age ye di, idi Jesus dirokenen, “Õ tamã nain?”

Jesus solof iron, “Ã aya nigin ado neu Dei nigineg keleĩ sã. Ã aya nigin keleim are, neu Dei nigineg keleim.” ²⁰Ĩ tempel bun kolekta inoya nẽ modoũ non ifelneĩd fen, od enei wogõ fiyēdin. Anĩ ere, takam ĩ to ima ka fen, ere nigin, in sain fau isiya sã.

²¹Jesus baban idi irokenēdin, “Aya atorneĩ di, ã umirnagauf, agog fen, ã ãgenei mosor bun gare gouf. Aya elef nẽ an, ã isiya kisi feleya sã.”

²²Anĩ bunem, Juda tamo idi diron, “Ĩ yogo bouwa yukesiyouf de? Anĩ nigin, ĩ, ‘Aya elef nẽ an, ã isiya kisi feleya sã,’ yef de?”

²³Anĩ ere, Jesus tobol fe fen, irokenēdin, “Ã tenebur temelei, aya ilun temelou. Ã teneub enei nẽ, aya teneub enei nẽ sã. ²⁴Anĩ nigin, aya, ã ãgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai ãgenei mosor bun gare gouf.”

²⁵Age ye di, idi ĩ to difiyen, “Õ ai?”

Jesus idi irokenēdin, “Aya aib anĩ, mogo gariya bunem arokeneik asin. ²⁶Aya ã nigin wogõya musei ado, es fiya nigineg musei. Anĩ ere, sur fiyan ĩ, momoi bagai, anĩ nigin, ereb aya ĩ bun karĩ aun anĩ, tamo kayau tenebur ein arokenēdif.”

²⁷Idi, ĩ Tama nigin irokenēdif ya anĩ, to kisi fokõ yen. ²⁸Anĩ nigin, Jesus iron, “Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam ereb taka to age afedig, anĩ ere, aya Dei ifelnan anĩ dogol wogõ audig anĩ, ã keleĩ youf. ²⁹Aya sur fiyan ĩ, amã urom mabodok, ĩ mugu to itornal, ere nigin, aya faimud, ereb ĩ wau al fouf anĩ, age afedig.” ³⁰Age wogõ ye di, musei ĩ nigin momoi den.

Abraham Gere Tar

³¹Jesus, Juda tamo ĩ momoi difiyen anidi irokenēdin, “Aya afelnein anĩ uroug tokõ walagauf are, ã momoi bagai neu dõ fiya tar. ³²Agog fen, ã momoi anĩ keleĩ youf, momoi anim kafĩ fiya bun tamal yalnelneif.”

³³Idi aiten dale dirokenen, “Amã Abraham nẽ ibor nẽ tubu tar, amã aib taka nẽ ferfer to mabodon. Ere wo fen, amã kafĩ fiya bun tamal yalnelnamãya nigin urok?”

³⁴Jesus aitedin yale iron, “Aya ā momoi bagai arokeneik, taka ī mosor inof are, ī mosor nē ferfer. ³⁵Ferfer ī, ibor anī bun gai ibodkeleya modoū sã, anī ere, modoū are naal nē faimud ibodkalauf. ³⁶Anī nigin, Naal ī kafī fiya bun tamal yalelneif are, ā momoi bagai karika lauf. ³⁷Å Abraham nē ibor nē tubu tar are, aya keleĩ. Anī ere, ā aya unakesigouf nigin dodok gef, ere nigin, ā neu od nē modoū namein to ibodok. ³⁸Ereb aya Dei mala bun ailen anī, aya ā arokeneik, āg erab āgenei temeĩ bun karĩ gen anī ago gedig.”

³⁹Idi aiten dale dirokenen, “Abraham ī tamamã.”

Age de di, Jesus iron, “Å Abraham gere tarem are, Abraham age fedin anī ago gem. ⁴⁰Gama ā, aya Negur bun momoi anī karĩ au fen, arokenein anī, unakesigouf nigin naab umirēgef. Abraham ī to age fen. ⁴¹Å temeĩ age fedig anī ago gef.”

Age ye di, idi Jesus dirokenen, “Amã seseirã inoya naab bun temelamã sã. Nemã Tamamã are Negur yogo dogol.”

Satan Gere Tar

⁴²Jesus idi irokenēdin, “Negur ī Temeim are, ā aya nigin wauĩ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan. ⁴³Ere nigin neu od nigin wauĩ to fokō yef? Are aya wogō auf anī, ā kariya kisi feleya sã nigin. ⁴⁴Å, temeĩ Satan nē, anī nigin, ā temeĩ nē oroya dō fiya nigin oroyeik. Ī gariya bunem isin, ī yukesiya kaa, momoi to iroudig, ere nigin, ī namen momoi sã. Ereb sain ī idegēya od wogō yedig, ī yogon od bagai wogō yedig, ere nigin, ī kori tamal, idegēya tama. ⁴⁵Anī ere, aya momoi anī wogō audig nigin, ā to momoi wiyagedig! ⁴⁶Å takam, aya neu mosor anī tau kurō fesiya kisi feleya? Aya momoi wogō auf are, ere nigin ā to momoi wiyagef? ⁴⁷Aib ī Negur nē, ī Negur erab yef anī karĩ yedig. Å to karĩ gef anī nē gariya are, ā Negur nē sã nigin.”

Jesus Yogo Nigin Iron

⁴⁸Juda tamo aiten dale dirokenen, “Amã ō Samaria tamal, kaa sanem ironon mauf are, momoi to morok de?”

⁴⁹Jesus solof iron, “Aya kaam to ironan, anī ere, aya neu Dei yana seli abidig, ā aya selu to wabigedig. ⁵⁰Aya yug nigin fula fiya medeīya to amirek, anī ere, taka ī anī imirek are ibodok, ī anī es fiya tamo. ⁵¹Aya ā momoi bagai arokeneik, taka ī neu od irou kafī falauf are, ī laa to bagai gurug fouf.”

⁵²Juda tamo, anī bun Jesus dirokenen, “Gama amã keleĩ, ō kaa sanem ironon! Abraham laa fen, profeteg gare den, anī ere, ō, taka ī ogon od irou kafī falauf are, ī laa to bagai kobūf ilouf, wof. ⁵³Ō tamamã Abraham wal fiya de? Ī laa fen, profeteg age difen. Ō kisi wof, ō ai?”

⁵⁴Jesus aitedin yale iron, “Aya yug selu alesauf are, neu seli alef are ege. Neu Dei, ĩ anĭ āgenei Negur gef, ĩ aya yanau yalesedig. ⁵⁵Ā ĩ keleĭ sã, anĭ ere, aya ĩ keleĭ. Aya ĩ keleĭ sã auf are, aya ā gen idegēya tamouf, anĭ ere, aya ĩ keleĭ bagai, in od dō afedig. ⁵⁶Temeĭ Abraham ĩ, neu naa anĭ ilouf nigin kisif fen, wau al fen. ĩ anĭ mogo ile fen, kulĭ yen.”

⁵⁷Anĭ nigin, Juda tamo Jesus dirokenen, “Ō fau yar fifti yaleya sã, anĭ ō mogo Abraham ulen de?”

⁵⁸Jesus idi irokenēdin, “Aya ā momoi bagai arokeneik, Abraham gō fiya sã mog, aya abodon.” ⁵⁹Anĭ nigin, idi ĩ meein tulu difouf nigin meein gei difen, anĭ ere, Jesus bouwa inokel fen, tempel modou bun tamal iya ilen.

Jesus Tamo Taka Mala Ifofakeleya Gō Difiyen Anĭ El Fiyen

9 ¹Jesus iyok ile fen, tamo taka mala ifofakeleya gō difen anĭ ilen. ²In dō fiya tar Jesus to difiyen, “Rabi, aim mosor ino di, ĩ mala ifofakeleya gō difen, tamo enei yogo de, sina tamam de?”

³Jesus aitedin yale iron, “Tamo eneimeg sã, sina tama adomeg sã, anĭ ere, Negur nē kabĭ ĩ bunem yaorouf nigin eig fiya wō yen. ⁴Eĭ fau gaa ado, aya sur fiyan in kabĭ talouf bagai. Bō fau isif, sain anĭ, taka nem kabĭ yaleya kisi feleya sã. ⁵Sain aya tenebur abodok, aya teneub enei nē fula fiya.”

⁶Age wogō yel fen, ĩ tenebur isis fen, salina buru ado falei fe fen, tamo mala bun inon. ⁷Jesus ĩ irokenen, “Ule, Siloam naan kukor ugū” (Siloam nē gariya, are ‘Sur fiyen’). Anĭ nigin, tamo ile, naan igun, agef fen, mala kelē yel, fō bun isin.

⁸In fō tura tar ado, idi ĩ nonĭ ye mog diledig anidi diron, “Tamo de eneim ibod ken, nonĭ yedig anĭ sã de?” ⁹Idi tunĭ diron, “Im.”

Tunĭ diron, “Im sã, taka ĩ genem.”

Anĭ ere, ĩ yogo iron, “Aya de tamo anim.”

¹⁰Idi ĩ dirokenen, “Naig fe di, ō malā kelē yeledin?”

¹¹Ā aitedin yale iron, “Tamo yana Jesus dedig im, buru falei fe fen, malau uru bun inodin. Ā, aya ele, Siloam naan agūf nigin irokanan. Anĭ aya ele, naan agun, age afe fen, aya malau kelē aun.”

¹²Idi ĩ to difiyen, “Tamo are nain?”

Ā iron, “Aya keleĭ sã.”

Farisia Tamo Idi Mala El Fiyen Nē Gariya Dimiren

¹³Idi tamo mala ifofakelen anĭ, Farisia tamo gedin dale dirou disin.

¹⁴Jesus buru falei fe fen, tamo mala el fedin nē naa are Sabat naa. ¹⁵Anĭ nigin, Farisia tamo idig, ĩ naig fe fen, mala kelē yedin anĭ to difiyen. Tamo are irokenēdin, “Ā malau buru inodin, age fe di, agun, anĭ aya gama kelē auf.”

¹⁶ Farisia tamo tunī diron, “Tamo enei Negur bun tamal sã, ere nigin, ī Sabat naa to dō fef.”

Anī ere, tunī diron, “Naig fe di, mosor tamo memelik age fediya inoya kisi feleya?” Anī nigin, idi fara difen.

¹⁷ Idi baban tamo mala ifofakelen anī dirokenen, “Ī ō malã el fen anī, ō ī nigin ere wof?”

Age de di, ī iron, “Ī profet.”

¹⁸ Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin. ¹⁹ Idi to difen, “Eī ā naaluī de? De ī anī mala ifofakeleya gō mafen gef? Naig fe di, ī gama sã mala kelē yelef?”

²⁰ Sina tama diron, “Amã keleī, ī nemã kesu, anī ī mala ifofakeleya gō mafen. ²¹ Anī ere, ī naig fe fen, gama sã lo fef, aim ī mala el fedin anī, amã keleī sã. Yogo to wiyēg, ī biya, yogo nigin wogō youf.” ²² Sina tama idi, Juda tamo kumī difiyeid fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf. ²³ Age fiya nigin, sina tama eig de diron, “Ī biya, yogo to wiyēg.”

²⁴ Baban Juda tamo idi, mala ifofakelen anī diweigne ken, diron, “Negur yana wales fen, momoi nē od dogol urōf, amã keleī, tamo are mosor tamal.”

²⁵ Ī solof iron, “Ī mosor ado be sã be, aya keleī sã. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ī to difiyen, “Ī ō ere naig yon? Naig fe di, ō malã birikã fedin?”

²⁷ Ī aitedin yale iron, “Aya ā mogo arokenein, anī ere, ā to karī gen. Ere nigin ā baban karī gou fenē? Āg in dō fiya tar wowã gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amã are Moses nē dō fiya tar! ²⁹ Negur Moses wogō fiyen are amã keleī, anī ere, tamo enei nigin, ī nainenem isin areg, amã keleī sã.”

³⁰ Tamo anī aitedin yale irokenēdin, “Ago ge di, terē auf. Ī nainenem isin, ā keleī sã, anī ere, aya malau birikaū fedin. ³¹ Amã keleī, Negur ī mosor dinodidig anī to karī fiyēdidig, anī ere, taka ī Negur anini fiye ken, Negur nē oroya dō fef are, Negurem ī karī fiyēdig. ³² Gariya bunem isi gama, taka nem, tamo mala ifofakeleya gō difen anī birikã fedin yeya to karī yedig. ³³ Tamo enei Negur bun tamal sam are, ī ereb taka to naig fem.”

³⁴ Age ye di, idi diron, “Ō mosor barikã gō diyon, naig fe di, ō amã ufelnamak?” Age de fen, idi ī mayarē diru dirã di, isin.

Uur Bun Mala Ifofakeleya

³⁵ Jesus, idi tamo anī serē diran yeya anī karī yen. Jesus ī fotou fiye ken, iron, “Ō Tamo Naal nigin momoi wof de?”

³⁶Tamo to fen, “Oduḡ, ai anī ī? Urokana di, aya ī nigin momoi auf.”

³⁷Jesus iron, “Ō gama ī ulel, de ī anī urom wogō gef.”

³⁸Age ye di, tamo iron, “Oduḡ, aya momoi auf.” Agef fen, ī Jesus seli yabin.

³⁹Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

⁴⁰Farisia tamo tunī Jesus geid difaren anī, agef wogō ye di, karī de fen, to difen, “Ere? Amāḡ malamā ifofakeleya de?”

⁴¹Jesus iron, “Ā momoi bagai meleī ifofakeleyam are, ā mosor sam, anī ere, gama ā malamā kelē yef gef, anī nigin, āgenei mosor fau ibodok.

Sipsip Lo Fiya Tamo Yogon Sipsip Geid

10 ¹“Aya momoi bagai arokeneik, tamo taka ī, sipsip nē kauwor bobog bunem to ilauf, anī ere, naab taka bunem gar ye isilauf are, ī bē tamo, bē yaledig. ²Tamo ī bobog bunem ilef are, ī yogo sipsip marau. ³Lo fedig tamo ī bobog kāf kenēdidig, age fe di, sipsip ī ait karī dedig. Ī yogon sipsip yana yaleid fen, mayarē guri feid, irouledig. ⁴Sain ī yogon ganan mayarē guri feid iroule fen, ī ketem uyu iledig, age fe di, yogon sipsip dō difedig, ere nigin, idi yogon ait keleī. ⁵Anī ere, idi tamo urug to dō difedig, idi ī mā diyawauf, ere nigin, ī ait urug nigin idi keleī sā.” ⁶Jesus yaab od enei nem wogō fiyēdin, anī ere, ī idi ereb gariya nigin irokenēdin anī, idi to kelein.

⁷Anī nigin, Jesus baban iron, “Aya ā momoi bagai arokeneik, aya sipsip neid bobog. ⁸Ganan uyulil disin are, idi bē tamo, bē daledig, anī ere, sipsip idi to karī difiyēdin. ⁹Bobog are aya, taka ī aya bunem isiyouf are, mata kel yalouf. Ī namen isi fen, ulō yeis ilauf, agef fen, fisir yōya nē fotou fouf. ¹⁰Bē tamo are bē nigin, yukesiyouf nigin ado, narī fouf nigin dogol isif, aya idi mata dale fen, barikāuf nigin asin.

¹¹“Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig. ¹²Oroi tamo are ī sipsip marau sā. Anī nigin, ī gaū kuī isi di, ile fen, sipsip itorarā iyadig. Age fe di, gaū kuī sipsip kaka feid fen, firagagaū fedidig. ¹³Tamo are iyadig, ere nigin, ī oroi tamo, sipsip nigin to karī yedig.

¹⁴“Aya sipsip lo fiya tamo biya, aya neu sipsip keleī, neu sipsip idi aya keleī, ¹⁵are Dei ī aya keleī, aya Dei keleī gen. Anī nigin, aya neu mata sipsip nigin atorok. ¹⁶Aya sipsip tunī ado, are sipsip kau enei bun temeleid sā, aya idig de guri afeid, arou asiyouf. Idig aitou karī douf, age fe di, idi uū tekelei, sipsip lo fiya tamo tekelei youf. ¹⁷Neu Dei, aya nigin wau laa fef nē gariya are, aya neu mata baban kel yalouf nigin anī atorok. ¹⁸Taka nem neu mata to son fiyauf, anī ere, aya neu oroyam neu mata atorok. Aya neu mata itorōya nigin megeir ado, kel yaleya nigineḡ megeir ado. Od enei neu Dei bun tamal alen.”

19 Juda tamo od enei nigin baban fara difen. 20 Musei idi diron, “Ī kaa sane ado, agef fen, wadak. Ere nigin ĩ karĭ wiyēgef?”

21 Anĭ ere, tunĭ diron, “Wogōya enei are, tamo kaa sane ado nē sã. Kaa sane ĩ mala ifofakeleya birikã feleya kisi feleya de?”

Juda Tamo Idi To Momoi Den

22 Sain anĭ bun, Negur bun Kel Inoya nē Sifa naa Jerusalem wō yen. Are saneya sain. 23 Anĭ Jesus tempel modoū bun, Solomon nē Waranda dō fef iyon. 24 Juda tamo guru de, Jesus salili difiye ken, dirokenen, “Sain ganĭ amã lo wamã di, nene mauf? Ō Kristus ouf are, amã el wo, faded wamãf.”

25 Jesus aitedin yale irokenēdin, “Aya mogo arokenein, anĭ ere, ā to momoi gef. Memelik neu Dei yana nem anodif, are aya nigin irok. 26 Anĭ ere, ā to momoi gef, ere nigin, ā neu sipsip sã. 27 Neu sipsip aya aitou karĭ dedig, aya idi keleĭ, anĭ nigin, idi aya dō difiyadig. 28 Aya idi mata faimud ibodkeleya afenēdidig, age afe di, idi to bagai inanakalauf. Takam idi imaun tamal to sosoin fiyauf. 29 Neu Dei idi aya ifanan ĩ, ereb ereb ganan wal fiya. Takam idi neu Dei ima bun tamal son fiya kisi feleya sã. 30 Aya Dei ado tekelei.”

31 Juda tamo baban ĩ meein tulu difiyēf nigin, meein gei difen. 32 Anĭ ere, Jesus idi irokenēdin, “Aya Dei bun tamal, ā memelik odudug musei afelnein. Anidi atun nanĭ anĭ nigin, ā aya meein tulu wiyagau fenē?”

33 Juda tamo aiten dale diron, “Amã anidi taka nigin meein to tulu mayōf, anĭ ere, Negur kono fiya nigin, ere nigin, ō tamo maug anĭ, ‘aya Negur’ wof.”

34 Jesus idi aitedin yale irokenēdin, “Āgenei Lo bun itotoya anĭ to ibodok de, ‘Aya aron, ā waitou’[§]? 35 Negur nē od idi bun isin are, Negur idi anĭ waitou yen. Negur nē Itotoya are narĭ fiya kisi feleya sã. 36 Age yen ouf are, Dei yogon bagai igrina fen, ein tenebur sur fiyan anĭ, aya Negur Naal aul anĭ, ere nigin aya kono afel wiyagef? 37 Aya ereb neu Dei age fedig anĭ, to age afef are, aya to momoi wiyagauf. 38 Anĭ ere, aya age afe di, ā neu od to momoi goufeg, memelik anodif anĭ momoi gouf, anĭ bunem Dei aya bun ibodok, aya Dei bun abodok ya anĭ, ā karĭg fen, keleĭ youf.” 39 Idi baban Jesus ka difiyēf nigin age difen, anĭ ere, ĩ oreis iyawon.

40 Agef fen, Jesus ĩ, Jordan naan sitakã, uruwa bun Jon naan igunēdin modoū bun, kel ile, an ibodō di, 41 tamo kayau musei ĩ garan disi diron, “Jon memelik taka to inon, anĭ ere, Jon tamo enei nigin wogō yen ganan, are momoi.” 42 Age de fen, an musei idi Jesus nigin momoi den.

Lasarus Laa Fen

11 1 Gama tamo Lasarus dedig dagin. Ī Betani tamal, Maria ĩ tura Marta ado neid fonō. 2 Maria de anim, kulu moul sumeĭ biya ado,

§ 10:34 Sam 82:6: Negur ĩod enei Juda nē es fiya tamo ifenēdin.

Jesus bun fi fel fen, fatiyam Jesus ye waĩ fen. Ĩ main Lasarus gama dagi yenek. ³Anĩ nigin, main tar Jesus garan od sur difen, “Odug, ĩ nigin waũ laa fedig are dagi.”

⁴Jesus ĩ enei karĩ ye fen, iron, “Dagi eneim to laa ilauf, are Negur nẽ fula fiya medeĩya nigin, anĩ bunem, Negur Naal yana dalesauf.” ⁵Marta, tura ado, maineid Lasarus nigin, Jesus wau laa fen. ⁶Anĩ ere, Jesus ĩ Lasarus dagi yenek ya karĩ ye fen, ĩ ibodon nẽ an baban naa uru ibodon.

⁷Anĩ bure fele di, Jesus in dõ fiya tar irokenẽdin, “Ada Judia distrik baban keku tagauf.”

⁸Anĩ ere, idi diron, “Rabi, õ gama bagai Juda tamo meein tulu diyõf nigin age difen, anĩ õ an kel ulau fenẽ de?”

⁹Jesus irokenẽdin, “Gaa tekelei bun aua tuwelf to ado de? Anĩ ege aa luwan to ilauf. Tamo ĩ gaa ado iyok, ĩ ye to tũ fedig, ere nigin, ĩ teneub enei nẽ lalan anim lo fedig. ¹⁰Sain ĩ bõ iyõf are, ye tũ foug, ere nigin, ĩ lalan sã.”

¹¹Enei irokel fen, Jesus idi irokenẽdin, “Neda mou Lasarus ĩ mulã yenek, anĩ ere, aya turĩ afiyẽf nigin an elef.”

¹²In dõ fiya tar Jesus solo de dirokenen, “Odug, ĩ yenek are, ĩ fau karikauf.” ¹³Lasarus laa fen nigin Jesus iron, anĩ ere, in dõ fiya tar kisi difen, ĩ mulã yeneya maug bagai nigin irok den.

¹⁴Anĩ nigin, Jesus idi faded feid, irokenẽdin, “Lasarus laa fen. ¹⁵Ã nigin au fen, aya an to abodon anĩ nigin, aya wau al fef, ere nigin, anĩ bunem ã momoi gouf. Anĩ ere, ada ĩ gein talauf.”

¹⁶Anĩ nigin, Tomas Didimus dedig, dõ fiya tar tunĩ ganan irokenẽdin, “Weim gare tauf nigin, adag talauf.”

Jesus Lasarus Main Tar Waud Wã Fen

¹⁷Sain Jesus ile wõ yen are, Lasarus mogo matmat bun naa fo ilelen anĩ karĩ yen. ¹⁸Betani are Jerusalem melsã, tri kilomita age fiya. ¹⁹Juda tamo kayau musei, Marta Maria ado maineid laa fen anĩ, waud yo difoug nigin idi gedin disin. ²⁰Marta Jesus isif ya karĩ ye fen, Jesus fotou foug nigin ilen, anĩ ere, Maria ĩ fõ bun ibodon.

²¹Marta Jesus irokenen, “Odug, õ ein udobom are, mainou to laa fem. ²²Anĩ ere, aya keleĩ, gamag õ ereb taka nigin Negur urokenẽf are, ifonõf.”

²³Jesus Marta irokenen, “Nẽ main baban kel fã youf.”

²⁴Marta Jesus aiten yale iron, “Aya keleĩ, idikeleya naa kel fãya sain bun, ĩ baban kel fã youf.”

²⁵Jesus ĩ irokenen, “Aya dogol kel fãya nẽ ado mata nẽ. Taka ĩ aya nigin momoi yef are, ĩ mata ibodõf, laa foug, ĩ mata ibodõf. ²⁶Taka ĩ mata ibod ken, aya nigin momoi yef are, ĩ to bagai laa foug. Õ enei momoi wof de?”

²⁷Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

28 Ī agef irokel fen, ĩ kel ile, tura Maria iweigne ken, mugun irokenen. Ī iron, “Tise yeir, ĩ iweignok.” 29 Maria od enei karĩ ye fen, ĩ kaisā bagai fā yale, Jesus garan ilen. 30 Jesus fonō wōya sā, ĩ fau Marta fotou fiyen modoũ anĩ bun ibodon. 31 Juda tamo kayau, Maria geid, fō bun dibod ken, ĩ wau wā difenen, ĩ kaisā bagai fā yale, ulō yeis ile di, dile fen, ĩ matmat bun inā yalouf nigin ilef de fen, dō difiyen.

32 Sain Maria Jesus ibodon nē modoũ anĩ bun wō ye, Jesus ile fen, ĩ ye gariyan kubū ye fen, iron, “Odug, ō ein ubodom are, mainou to laa fem.”

33 Sain Maria inā yalen ado, Juda tamo kayau Maria geid disin idig inā dalen, Jesus anĩ ile fen, wau fatuk bagai gudūf morō fen. 34 Jesus to fen, “Ī nain mū gen?” Idi diron, “Odug, usi fen, ule.”

35 Jesus ĩ inā yalen.

36 Age fe di, Juda tamo kayau diron, “Ulegef, ĩ nigin fatuk bagai wau laa fen anĩ!”

37 Anĩ ere, idi tunĩ diron, “Ī tamo mala ifofakeleya birikā fedin, tamo eneig laa bun ileya nigin katĩ feleya to kisi feleyan de?”

Jesus Lasarus Laa Bun Tamal Turĩ Fen

38 Jesus baban wau fatuk bagai gudūf fen, matmat bun isin. Matmat are ku, meein nem bobog katĩ difelen. 39 Jesus iron, “Meein waleleg.”

Marta, laa tamo nē main iron, “Anĩ ere, Odug, are gama waai sane, ere nigin, ĩ an naa fo ibodon.”

40 Age ye di, Jesus iron, “Ō momoi wof are, Negur nē fula fiya medeĩya ulouf, to age ayon de?”

41 Anĩ nigin, idi meein are dalelen. Age dife di, Jesus itad fen, iron, “Dei, ō aya karĩ wiyal nigin, ō de ayok. 42 Aya kelein, ō faimud aya karĩ wiyadig, anĩ ere, aya tamo kayau yeir difaref nigin od enei orom, are idi onom aya sur wiyān anĩ momoi douf nigin.”

43 Jesus od enei wogō yel fen, ait odug nem iwegin, “Lasarus, ulō weis!” 44 Laa tamo, ye, ima gabar masak nem filu difen ado, nawa gabarem sile difen ulō yesi di,

Jesus idi irokenēdin, “Gabar waleleg fen, utornēge di, ile.”

Jesus Dukesiyouf Nigin Od Difon

(*Matyu 26:1-5; Mak 14:1, 2; Luk 22:1, 2*)

45 Anĩ nigin, Juda tamo kayau musei Maria gein disin, Jesus ereb age fen anĩ dile fen, ĩ nigin momoi den. 46 Anĩ ere, idi tunĩ Farisia tamo gedin dile fen, Jesus ereb age fen anĩ dirokenēdin. 47 Anĩ nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif. 48 Ada lo tafe di, ĩ enei eig fef ilauf are, tamo ganān ĩ nigin momoi douf, age dife di, neda ibodōya ado teneub, Rom tamom disi dalouf.”

⁴⁹Age de di, idi atun taka, yana Kaiafas, ĩ yar anĭ bun pris neid mudur ibod ken, wogō yen, “Ā ereb taka keleĭ sĀ! ⁵⁰Tamo kayau ganan inanakalauf ban, tamo tekeleim tamo kayau nigin laa foug, are ā nigin deuf anĭ, ā to kisi gef.”

⁵¹Ī yogon kisi bunem od enei to iron, anĭ ere, ĩ yar anĭ bun pris neid mudur ibodon nigin, profet od wogō yen, Jesus Juda tamo kayau ganan nigin laa foug yen. ⁵²Are Juda tamo kayau nigin dogol sĀ, Negur gere tar firagagaũ difen anidig, guri feid irusi kuru fedi di, idi tekelei youf nigin, Jesus laa foug yen. ⁵³Anĭ nigin, naa anĭ bunem ilen, idi Jesus dukesiyouf nigin naab dimiren.

⁵⁴Age dife di, Jesus ĩ, Juda tamo kayau meleid bun mala yaor to iyon, ĩ an iminkele fen, teneub akor taka, gerere tuan melsĀ, fonō yana Efraim ilen, an yogon dō fiya tar geid dibodon.

⁵⁵Sain anĭ Juda neid Pasa naa melsĀ, musei fonō fonō temeleid, dogo neid nonorou lilik fiya nigin, Pasa naa wōya sĀ mog, Jerusalem diselen. ⁵⁶Idi Jesus nigin meleid dinof diyon. Idi tempel modoũ bun difar fen, abob to difen, “Ā ere kisi gef? Ī Sifa bun to isiyoug de?” ⁵⁷Anĭ ere, pris odudug Farisia tamo geid, taka nem Jesus nain be ibodok ya anĭ ile fen, irokenēdi di, dirounēf nigin wedereid diroun.

Betani Oun Jesus Ye Bun Maria Moul Fi Felan

(*Matyu 26:6-13; Mak 14:3-9*)

12 ¹Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ĩ Jesusem laa bun tamal turĭ fiyen. ²An Jesus nigin waud el fe fen, bō saaf dabin, anĭ Marta aruna yalen. Idi Jesus geid tebol bun dibodon atun, Lasarus ibodon. ³Age de mog, Maria moul sumeĭ biya, hap lita nad nem dinon, are moni odug nē anĭ yale fen, Jesus ye bun fi fel fen, fatiyam ye waĭ fen. Age fe di, moul sumeĭ biyam, fō anĭ ino yalen.

⁴Anĭ ere, Judas Iskariot, in dō fiya taka, fau dum im Jesus kiwai imeid bun inouf, im iron, ⁵“Ere nigin moul sumeĭ biya enei, na nigin sur fe fen, moni anĭ maleg tamo to ifenēdiyam? Are yar tekelei bun, kabĭ tamo nē mala yaledig kilei.” ⁶Ī maleg tamo nigin kisif fen, enei to iron, ĩ yogo bē tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

⁷Anĭ nigin, Jesus iron, “Kayau are utornēg, ĩ aya mū difiyauf naa nē nigin, moul sumeĭ biya enei irouwauf. ⁸Maleg idi, ā geid sain faimud ubodōgouf, anĭ ere, aya, ā geid sain faimud to tabodōf.”

⁹Age de mog, Juda tamo kayau musei, Jesus an ibodok ya kelei ken, disin, are ĩ nigin dogol sĀ, Lasarus Jesusem laa bun tamal turĭ fiyen ĩg dilouf nigin. ¹⁰Anĭ nigin, pris odudug Lasarus ĩg dukesiyouf nigin naab dimiren, ¹¹ere nigin, Lasarus bunem, Juda tamo kayau musei Jesus garan dile fen, ĩ nigin momoi den.

Jesus Tamo Yana Ado Gen Jerusalem Ilen
(*Matyu 21:1-11; Mak 11:1-11; Luk 19:28-40*)

¹²Naa anī ile di, tamo kayau musei Sifa bun disin, Jesus Jerusalem isif ya anī karī den. ¹³Idi pam aarau anā aarau gen anī guri de, Jesus tarabā difiyēf nigin dile fen, diweig diron,

“Hosiana!”^h”

“Odug yana bunem isif, ī el fiya ado!”ⁱ”

“Israel neid King, ī el fiya ado!”

¹⁴Jesus donki naal fotou fe fen, teten ibodon, are Negur nē Itotoya eig ye irok kilei,

¹⁵“To kumīg, Saion nē tamo kayau,
uleg, āgenei king,
donki naal teten ibod ken, isif.”^j”

¹⁶Uruwa bagai, in dō fiya tar, enei ganan nigin wedereid fokōya san. Dum Negur Jesus fula fiya medeīya ifenē di, enei ī nigin ditoton ado, enei tamo kayau ī bun age difen anī, wedereid fokō yen.

¹⁷Tamo kayau Jesus geid difar fen, ī Lasarus matmat bun tamal iweigne ken, laa bun tamal turī fe di, lo difen idim wogagā def, dile di, od iyokelen. ¹⁸Tamo kayau musei, Jesus memelik anī inon karī den nigin, ī fotou difiyēf nigin dilen. ¹⁹Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganan ī dō difiyek!”

Jesus Yogon Laa Nigin Iron

²⁰Sifa bun Negur yana dalesauf nigin diselen idi atun, Grik tunī difaren. ²¹Idi Filip Betsaida tamal Galili teneub bun, ī garan disi fen, to difiyē diron, “Tamo biya, amā Jesus mailau fenē.” ²²Age de di, Filip ile, Endru iroken ken, uruwom Jesus dirokenen.

²³Jesus idi irokenēdin, “Negur Tamo Naal fula fiya medeīya ifenēf nigin, sain anī mogo yeir isil. ²⁴Aya ā momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ī burauf are, faat musei wowā douf. ²⁵Tamo ī yogon mata nigin wau laa fef are, ī mata anī itornēf, anī ere, tamo ī teneub enei bun, yogon mata atorok bagai ye fen, itorok are, ī ironnek ile, mata ibodkeleya bun ilauf. ²⁶Taka ī aya arunau yalef, ī aya dō fiyauf bagai. Aya abodok nē an, neu kabī tamo īg an ibodōf. Taka ī arunau yalef, neu Dei ī yana yalesauf.

²⁷“Gama neu wau morok, anī aya ere auf? ‘Dei sain enei bun usenna,’ auf de? Sā, gariya enei nigin bagai, sain enei bun asin. ²⁸Dei ogo yanā selī kulō!”

^h 12:13a Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. ⁱ 12:13b Sam 118:25, 26 ^j 12:15 Sekaraia 9:9

Age ye di, ait taka saa ilunem isin, “Aya mogo anī selu abin, aya baban anī selu abiyouf.” ²⁹Tamo kayau an difaren anī karī de fen, diron, kolimei den, tunī diron, engel takam wogō fiyem.

³⁰Jesus iron, “Ait enei, ā isenneī di, momoi gouf nigin, aya nigin sā. ³¹Gama Negur ī, teneub enei nē tamo kayau es fedif, gama teneub enei nē mudur iruwauf. ³²Anī ere, aya tenebur tamal dalesnauf sain, aya tamo ganan aya bun, didī afediyouf.” ³³Jesus yogo naig fe, laa fouf anī ifelnēdiyof nigin, od enei wogō yen.

³⁴Tamo kayau aiten dale diron, “Lo bun amā Kristus gai gai ibodōf ya anī karī maun, naig fe di, ō urok, “Tamo Naal ī dalesnēf bagai”? Ai anī Tamo Naal?”

³⁵Age de di, Jesus idi irokenēdin, “Sain naal bagai ā lalan adouf. Ā lalan ado mog, uyōg, anī bunem gugum to irusi kerū yeif. Tamo ī gugum bun iyok, ī naib ilef are keleī sā. ³⁶Ā lalan ado mog, āgenei momoiya lalan bun unog, ago gouf, ā lalan gere tar wowā gouf.” Jesus od enei wogō yel fen, ī itorneīd ile, iminkelen.

Juda Tamo Kayau Jesus Nigin Fau To Momoi Den

³⁷Jesus idi meleid bun memelik musei inodin, anī ere, idi fau ī nigin to momoi den. ³⁸Enei are profet Asaia nē od kisi falauf nigin wō yen:

“Odug, aim nemā od nigin momoi yen?
Aiyai bun Odug nē megeir yaor fen?”

³⁹Gariya enei nigin, idi momoiya kisi feleya sā, ere nigin, Asaia baban od enei iron:

⁴⁰“Negur idi meleid ifofa ken,
 waud ifofakelen,
 anī bunem, idi meledim ileyā kisi feleya sā,
 waud fokōya kisi feleya sā,
 waud faleiya kisi feleya sā, age fiya sam, aya el afedim.”^k

⁴¹Asaia od enei iron, ere nigin, ī Jesus nē fula fiya medeīya ile fen, ī nigin iron.

⁴²Mudur adodo idi atun, museig ī nigin momoi den. Anī ere, Farisia tamo idim Juda neid uub fō bun dirudidiya nigin kumī de fen, dogo neid momoiya to yaor difen. ⁴³Ere nigin, idi Negurem yeneid yaleseya ban, tamom yeneid dalesauf anī orodidig.

⁴⁴Jesus iweig iron, “Tamo ī aya nigin momoi yef, ī aya nigin dogol to momoi yef, ī aya sur fiyan nigineg momoi yef. ⁴⁵Ī aya lo fiyaf, im aya sur fiyan anī ilef. ⁴⁶Aya lalan anī, tenebur ein asin, are taka ī aya nigin momoi yef, ī gugum bun to ibodōf nigin age afen.

^k 12:40 Asaia 6:10

47“Taka ĩ neu od karĩ ye fen, to dō fef, aya ĩ to es afiyek, ere nigin, aya tamo kayau es fiya nigin to asin, aya kel gei fiya nigin asin. 48Taka ĩ aya itorna fen, neu od to irouf, ĩ nigin es fiya tamo ibodok. Od de wogō aun anim, idikeleya naa bun ĩ es fiyēf. 49Ere nigin, aya neu kisi nem to wogō aun, anĩ ere, Dei aya sur fiyan im, ere anĩ wogō auf, naig afe wogō auf anĩ, toli fiya di, wogō aun. 50Aya keleĩ, yogon si fiya are mata faimud ibodkeleya bun ileyā nē, anĩ nigin, erēb aya wogō auf, Dei aya wogō auf nigin irokanan kilei bagai, aya wogō auf.”

Jesus In Dō Fiya Tar Yeid Kulo Fedin

13 1Pasa nē Sifa fau wōya sã mog, Jesus kelein, ĩ teneub enei itor ken, Tama garan ileyā nē sain mogo wō yel. ĩ yogon tamo tar tenebur ein dibodok anidi nigin wau laa fedig, ĩ idi nigin wau laa fen are iroule idikeleya bun.

2Bō saaf dō mog, Satanem Judas Iskariot, Simon naal namen Jesus kiwai imeid bun ifenēf nigin, kisi mogo ifenen. 3Tama ĩ erēb erēb ganān, Jesus ima bun inon, ĩ Negur bunem isin anĩ, Negur bun kel ilef, are Jesus ĩ keleĩ. 4Jesus saaf bun ibodon anĩ fā ye, yogon kolos tetēn inukeis fen, taul yale, luwa gu fen. 5Age fel fen, ĩ naan yale, beĩ bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid wāi fedin.

6Jesus Simon Pita garan isi di, ĩ Jesus irokenen, “Odug, ō aya yeu kulo wou fenē de?”

7Jesus Pita aiten yale irokenen, “Ereb aya age afef, ō gama keleĩ sã, anĩ ere, fau dum ō keleĩ youf.”

8Pita iron, “Aya yeu to bagai kulo wouf.”

Jesus Pita irokenen, “Aya ō to kulo ayōf are, ō aya ado nigal fiya sã.”

9Simon Pita Jesus irokenen, “Odug, agouf are, yeu dogol sã, imau mudurou adog kulo wouf.”

10Jesus aiten yale iron, “Taka ĩ naan igukelel, ye dogol kulo fouf, bouwa ganān filiya. Ā filiya ba, anĩ ere, ā ganān sã.” 11Jesus ĩ aibem kiwai ifenēf anĩ keleĩ, anĩ nigin, ganān filiya sã yen.

12Jesus yeid kulof bure fel fen, yogon kolos ifounkel, yogon modoū bun kelen. Agef fen, ĩ idi to fedin, “Aya erēb ā bun age afel anĩ, ā wedereĩ fokō yef de? 13Ā aya ‘Tise’ ado ‘Odug’ gedig, are tutuk, ere nigin, aya de anĩ. 14Aya āgenei Tise ado Odug, ā yeĩ kulo afel, anĩ nigin, āg abob ye kulo gouf. 15Aya malakanon anokeneim, are ā nigin age afel gen, āg ago gouf. 16Aya ā momoi bagai arokeneik, ferfer takam yogon odug to wal fiyēdig, arū tamom ĩ sur fiyen to wal fiyēdig. 17Gama ā enei keleĩ, anĩ nigin, enei dōg ago gouf are, ā el yeif.

Jesus Ī Kiwai Imeid Bun Inenēf Nigin Iron
(*Matyu 26:20-25; Mak 14:17-21; Luk 22:21-23*)

¹⁸“Aya ā ganan nigin to wogō auf. Aya agirnēdin idi, aya keleī, anī ere, enei are Negur nē Itotoya bun yenek anī kisi falauf nigin, “Taka ĩ aya urom neu bret moko, ĩ aya kiwai ifana fen, dā fiyal.”¹

¹⁹“Anī fau to wō ye mog, gama aya ā arokeneik, anī bunem, anī wō youf sain bun, aya de Im ya anī momoi gouf. ²⁰Aya ā momoi bagai arokeneik, taka ayam sur afe di, ĩ yalef are, ĩ aya yaleyaf, taka ĩ aya yaleyaf are, ĩ aya sur fiyān anī yalef.”

Jesus Judasem Kiwai Ifenēf Yen
(*Matyu 26:20-25; Mak 14:17-21; Luk 22:21-23*)

²¹Jesus od enei wogō yel fen, ĩ wau moro ken, kurō feis iron, “Aya ā momoi bagai arokeneik, āgenei takam aya kiwai ifanauf.”

²²Yogon dō fiya tar idi abob loli difen, ai nigin bagai wogō yef de fen, nene den. ²³Idi neid taka, dō fiya taka Jesus ĩ nigin wau laa fedig ĩ, Jesus sirin ibodon. ²⁴Simon Pita, dō fiya tamo enei mudurem fiye ken, ĩ iron, “Ī ai nigin irok anī to wiyē.”

²⁵Dō fiya tamo anī, Jesus akoron mudur isen ken, to fen, “Odug, ō ai wof?”

²⁶Jesus aiten yale iron, “Tamo bret enei beī bun nu afe fen, afenēf anī.” Age ye fen, ĩ bret nuf fen, Judas Iskariot, Simon naal ifenen ²⁷Judas bret anī yale di, Satan ĩ namen ilen.

Jesus Judas irokenen, “Ereb agou fenē, kaisā bagai ago.” ²⁸Anī ere, saaf bun dibodon anī takam, ere nigin Jesus od enei Judas irokenen anī, kisi to fokō yen. ²⁹Judas ĩ moni lo fiya tamo nigin, tunī kisi difen, Sifa nē erēb erēb na yalouf nigin be, maleg erēb erēb ifenēdiya nigin be, Jesusem Judas irokenē di, ilef den. ³⁰Judas ĩ bret yale fen, kaisā bagai oreis ilen. Sain anī bō.

Pita Nē Wa Fiya Nigin Jesus Iron
(*Matyu 26:31-35; Mak 14:27-31; Luk 22:31-34*)

³¹Judas iya ile di, Jesus iron, “Gama Tamo Naal fula fiya medeīya yale di, Negur fula fiya medeīya Tamo Naal bun yalef. ³²Negur fula fiya medeīya Naal bun yalef are, Negur ĩ fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

³³“Neu kesu tar, aya ā geid sain naal bagai tabodōf. Ā aya umirnagauf. Aya Juda tamo arokenēdin kilei, gama ā arokeneik, aya elef nē an, ā isiya kisi feleya sā.

¹ 13:18 Sam 41:9

34 “Aya ãtãfiya mata afeneik, abob nigin wauĩ laa fouf. Aya ã nigin wau laa fedig kilei, ãg abob nigin wauĩ laa fouf bagai. 35 ã abob nigin wauĩ laa fouf, anĩ bunem tamo ganan idi keleĩ youf, ã neu dõ fiya tamo tar.”

36 Simon Pita Jesus to fiyen, “Odug, õ nai ulef?”

Jesus iron, “Aya elef nẽ an, õ gama aya dõ fiyaya kisi feleya sã, anĩ ere, õ fau dum dõ wouf.”

37 Pita to fen, “Odug, ere nigin gama aya õ dõ yõya kisi feleya sã? Aya õ nigin neu mata atorõf?”

38 Age ye di, Jesus iron, “Õ aya nigin ogon mata utorõf de? Aya õ momoi bagai arokonok, tataro fau kokorok yeya sã mog, õ aya nigin wa wo, towo wouf!”

Jesus In Dõ Fiya Tar Neid Waud Wã Fen

14 ¹ “ã wauĩ to morõ yeĩ. Negur nigin momoi gouf, aya nigineg momoi gouf. ² Neu Dei nẽ fõ bun aab musei ado, age fiya sam are, arokeneim. Aya eselef nẽ an, ãgenei modoũ dodok afouf. ³ Aya esel, ãgenei modoũ dodok afel fen, aya ã geid tabodõf nigin, aya kelau gei ayeif, are ãg aya abodok nẽ an ubodõgouf nigin. ⁴ Aya eselef nẽ naab anĩ, ã keleĩ.”

Negur Bun Ileya Naab, Jesus

⁵ Tomas Jesus irokenen, “Odug, õ narib ulef are, amã keleĩ sã, anĩ nigin, naig mafe fen, amã naab anĩ keleĩ youf?”

⁶ Jesus Tomas irokenen, “Aya dogol naab anĩ, aya dogol momoi anĩ, aya dogol mata anĩ. Taka ã naab taka bunem, Dei wagen to isiyouf, aya bunem dogol. ⁷ ã aya keleim are, ã neu Deig keleim. Gama sain enei bun ilauf, ã ã keleĩ, ã ulegel.”

⁸ Filip iron, “Odug, Tamada ufelnamã, anĩ amã nigin deuf.”

⁹ Jesus iron, “Filip, aya ã geid sain meluk tabodon, anĩ ere, õ aya keleĩ sã de? Taka ã aya ileyen are Dei ilen. Naig fe di, õ urok, ‘Tamada ufelnamã?’ ¹⁰ Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ã kabĩ yalef. ¹¹ Aya Dei bun abodok, Dei ã aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf. ¹² Aya ã momoi bagai arokeneik, taka ã aya nigin momoi yef, ereb aya age afedig, ãg age foug, enei age afedig anĩ wal fiyag age foug, ere nigin, aya Dei gein eselef. ¹³ ã ereb taka nigin, aya yanau nem to gouf, aya age afouf, anĩ bunem, Dei ã Naal bun, fula fiya medeĩya yalouf. ¹⁴ Ereb taka nigin, aya yanau nem to wiyagauf are, aya age afouf.”

Jesus Awa Uur Fateul Sur Afouf Yen

¹⁵ “ã aya nigin wauĩ laa foug are, neu ãtãfiya anĩ dõ gouf. ¹⁶ Aya Dei arokenẽ di, ã Isenneĩya taka, ã geid gai gai ibodõf nigin ifeneif, ¹⁷ are

momoi nē Awa Uur. Tenebur ein tamo kayau ī to dalouf, ere nigin, idi ī to dilef, to keleī. Anī ere, ā ī keleī, ere nigin, ī ā geid ibodok, ā bun ibodōf. ¹⁸Aya ā madmad gen to atorņeīf. Aya ā gein asiyouf. ¹⁹Sain naal bagai ile di, tenebur ein tamo kayau, aya to dileyauf, anī ere, ā uleyagauf. Aya mata abodok nigin, āg mata ubodōgouf. ²⁰Naa anī bun, aya neu Dei bun abodok, ā aya bun ubodōgef, aya ā bun abodok anī, ā keleī youf. ²¹Taka ī neu itāfiya irou dō fef, ī aya nigin wau laa fedig. Ī aya nigin wau laa fedig anī, neu Dei ī nigin wau laa fouf, ayag ī nigin wau laaf fen, aya yug ī bun yaor afouf.”

²²Age ye di, Judas taka (Judas Iskariot anī sã) iron, “Odug, ere nigin ō ogo, amã bun dogol ō yaorōf, tenebur ein tamo kayau bun sã?”

²³Jesus iron, “Taka ī aya nigin wau laa fef, ī neu od dō fouf. Neu Dei ī nigin wau laa fouf, anī amã ī gein masi, weim mabodōf. ²⁴Taka ī aya nigin to wau laa fef, ī neu od to dō fouf. Od enei ā karī gef, are aya bun tamal sã, are Dei aya sur fiyan nē od.

²⁵“Aya fau ā geid tabod ken, od enei ganan wogō ayein. ²⁶Anī ere, Isenneiya, Awa Uur Fateul anī, Deim aya yanau nem sur fouf, Awa Uur Fateul ī, erēb erēb ganan ifelnei ken, aya arokenein anī ganan wedereī fokōf fen, kisi turī fouf. ²⁷Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. Ā wauī to morō yei ken, kumīg.

²⁸“Aya eig au di, karī gel, ‘Aya ele fen, ā gein kelau asiyouf.’ Ā aya nigin wauī laa fem are, aya Dei bun elef anī nigin, ā kuliya adom, ere nigin, Dei ī aya wal fiyaya. ²⁹Anī wōya sã mog, aya mogo arokeneim, anī bunem, agef wō ye di, ā momoi gouf. ³⁰Aya ā geid, sain meluk to wogō tauf, ere nigin, teneub enei nē mudur mogo isif. Anī ere, ī aya lai fiyaya nigin megeir sã, ³¹anī ere, tenebur ein tamo kayau keleī bagai youf, are aya Dei nigin wau laa fef, anī nigin, neu Dei irokanan kilei bagai age afedig.

“Fafāg fen, modoū enei tatorōg.

Aa Wain Gariya Ado Yogon Were

15 ¹“Aya aa wain bagai, neu Dei ī kabī marau. ²Were aya bun biya to yuk anī ganan, Deim kokour falauf, were biya yuk anī ganan, Deim dē fe di, biya musei imauf. ³Aya od wogō ayein anim, ā amuyē sã, ā mogo filiya. ⁴Ā aya bun ubodōgouf, ayag ā bun abodōf. Were taka aa wain luwa ado to susu falauf are, yogo biya yūya kisi feleya sã. Age fiya bagai, āg aya bun to ubodōgouf are, biya yūya kisi feleya sã.

⁵“Aya aa wain gariya, ā were. Taka ī aya bun ibodō di, ayag ī bun abodōf are, ī biya musei imauf. Aya utornagauf are, ā erēb taka to ago gouf. ⁶Taka ī aya bun to ibodōf are, ī were diraille di, meti ledig gen. Were age fediya are gei de fen, yã dirarā di, isasaikelediyouf. ⁷Ā aya bun

ubodōge di, neu od ā bun ibodōf are, ereb taka oroyei ken, urokanage di, ifeneif. ⁸Biya musei ūg fen, neu dō fiya tar wowā gouf are, neu Dei ī fula fiya medeīya yalouf.

⁹“Neu Dei aya nigin wau laa fedig kilei, ayag ā nigin wau laa fedig. Gama ā neu wau laa fiya anī bun ubodōg. ¹⁰Aya neu Dei nē itāfiya dō afe fen, yogon wau laa fiya bun abodok kilei, ā neu itāfiya dō gouf are, neu wau laa fiya bun ubodōgouf. ¹¹Aya enei arokeneim, are neu kulīya ā namein ibod ken, āgenei kulīya barikāf nigin. ¹²Neu itāfiya are yeir, aya ā nigin wau laa fedig gen, āg abob nigin wauī laa fouf. ¹³Wau laa fiya enei wau laa fiya ganān wal fiya, are yogon mou tar nigin yogon mata itorok anī. ¹⁴Ā aya ereb itāfiya arokenein anī dōg, ago gouf are, ā neu mou tar. ¹⁵Aya baban ā to ferfer ayeif, ere nigin, ferfer ī yogon tamo odug nē kabī keleī sā. Anī ere, aya ā neu mou tar ayeim, ere nigin, ereb ereb ganān aya Dei bun karī aun anī, aya ā afelneim. ¹⁶Āgem aya to uginagen, aya ā agirnei ken, uleg, biya ūg fen, biya anī ibodkalauf nigin ā ayein. Agog fen, aya yanau nem, ereb taka nigin Dei urokenēge di, ifeneif. ¹⁷Enei anī neu itāfiya, abob nigin wauī laa fouf.

Tenebur Tamo Kayau, Dō Fiya Tamo Tar Nigin Kiwai Difenēdiyof

¹⁸“Tenebur tamo kiwai difeneif are, aya ketem kiwai difanan anī, ā keleī youf. ¹⁹Ā teneub enei nēf are, ā yogon nigin, ā nigin wau laa fouf. Anī ere, ā teneub enei nē sā, aya ā tenebur tamal gei ayei ken, agirnein. Anī nigin, tenebur ein ā kiwai difeneik. ²⁰Aya od arokenein anī, ā karī walagouf, ‘Ferfer taka yogon odug to wal fedig.’^m Idi aya darau difanan are, āg age de darau difeneif. Idi neu od dō difen are, idi āgeneig age de dō difouf. ²¹Idi enei ganān ā bun age difouf, ere nigin, aya yanau ā ado, are aya sur fiyan idi ī keleī sā nigin. ²²Aya to asi fen, arokenēdim are, idi mosor sam. Anī ere, idi neid mosor nigin to galā dūf. ²³Taka ī aya kiwai ifanaf, ī neu Deig kiwai ifenek. ²⁴Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman. ²⁵Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’ⁿ

²⁶“Awa Uur Isenneīya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf. ²⁷Āg agog kurō wesigouf bagai, ere nigin, ā aya geid fen, gariya bunem tasin.

16 ¹“Ā to felu rogouf nigin, od enei ganān mogo ā wogō ayeim. ²Idi ā Juda neid uub fō bun diruyeif. Takag, sain fau isiyouf bun, taka ī ā ideneīkeis fen, kisi fouf, Negur sesewi afiyek youf. ³Idi enei age difouf, ere nigin, idi Dei keleī sā, aya nigineg keleī sā. ⁴Aya enei mogo

^m 15:20 Jon 13:16 ⁿ 15:25 Sam 35:19; 69:4

arokeneim, are sain isiyouf bun, ā wedereĩ aroul anĩ, karĩ walagauf nigin. Aya enei tetun to arokenein, ere nigin, aya ā geiden.

Awa Uur Fateul Nē Kabĩ

⁵“Gama aya ĩ sur fiyan gein eselef, anĩ ere, ā takam to aya to fiyaf, ‘Ō nai ulef?’ ⁶Aya enei arokeneim nigin, ā fatuk bagai wauĩ gudũ fef. ⁷Anĩ ere, aya momoi arokeneik, aya āgenei biya fiya nigin eselef. Aya to eselauf are, Isenneĩya anĩ ā bun to isiyouf, aya eselauf are, aya ĩ, ā bun sur afouf. ⁸Sain ĩ isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kũ fenēya anĩ yaor fe, faded fediyouf. ⁹Mosor are, idi aya nigin to momoi def nigin. ¹⁰Negur nē madur fiya are, aya Dei gein esele di, ā aya to uleyagauf nigin. ¹¹Negur nē es fiya are, teneub enei nē mudur mogo es fiyen nigin.

¹²“Aya ā irokeneĩya nigin musei biya, anĩ ere, ā gama keleĩya kisi feleya sã. ¹³Anĩ ere, sain momoi nē Awa Uur isiyouf bun, momoi nē anĩ ganan bun, im itoneif. ĩ yogon kisim to wogō youf, ereb ĩ karĩ yef anĩ wogō youf, agef fen, ereb fau wō youf anĩ irokeneif. ¹⁴ĩ neu bun tamal yale fen, ā ifelneif, anĩ bunem, aya fula fiya medeĩya ifanauf. ¹⁵Dei nē ganan are neu, anĩ nigin, aya arom, Awa Uur neu bun tamal yale fen, ā ifelneif aul.

¹⁶“Sain naal bagai ile di, ā to uleyagauf, agef fen, baban sain naal bagai ile di, aya uleyagauf.”

In Dō Fiya Tar Waud Gudũ Fef Are Fau Kulĩ Douf

¹⁷In dō fiya tar tunĩ abob dirokenen, “Ere gariya nigin eig ye irok, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?” ¹⁸Idi anĩ fau fau wogō den, “Ī ere ye fen, ‘sain naal bagai’ yen? Ī irok anĩ, amã gariya keleĩ sã.”

¹⁹Idi enei nigin Jesus to difou fenē mog, Jesus anĩ ile fen, idi irokenēdin, “Aya eig aul anĩ nē gariya nigin abob to wiyēgef de, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf?’ ²⁰Aya ā momoi bagai arokeneik, ā fau maruĩ isi fen, wauĩ gudũ fouf, tenebur tamo kayau kulĩ de mog. Ā wauĩ gudũ fouf, anĩ ere, āgenei wauĩ gudũ fiya falei yel kulĩ youf. ²¹Kayau kesu ibodō fenē darau fef, ere nigin, yogon naa wō yel, anĩ ere, yogon kesu wō ye di, darau weder tu kelef, ere nigin, kesu tenebur wō yel nigin kulĩ yef. ²²Āg age fiya, gama āgenei wauĩ gudũ fiya nē naa, anĩ ere, aya baban ailiyeĩ di, ā kulĩ gouf, taka nem āgenei kulĩya to yalelkeneif. ²³Naa anĩ bun, ereb taka nigin ā to, to wiyagauf. Aya ā momoi bagai arokeneik, aya yanau bunem, ereb taka nigin neu Dei to wiyēgouf are, ifeneif. ²⁴Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ā kulĩya barikāf.

²⁵“Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneif. ²⁶Naa anī bun, aya yanau bunem to gouf. Aya ā nigin Dei to afiyēf ya anī to arokeneik, ²⁷ere nigin, ā aya nigin wauī laaf fen, aya Negur bun tamal asin anī, momoi gedig nigin, Dei ā nigin wau laa fedig. ²⁸Aya Dei bun tamal ulō aus fen, tenebur asin, gama aya teneub enei ator ken, Dei bun kelauf.”

²⁹Age ye di, Jesus nē dō fiya tar diron, “Gama ō yaor wogō wof, yaab od nem sã. ³⁰Gama amã mailef, ō ereb ereb ganan keleī, are taka nem to yōf anīg to tari wodig. Anī bunem, ō Negur bun tamal usin anī, momoi mauf.”

³¹Jesus aitedin yale iron, “Ā gama momoi gef de? ³²Anī ere, naa fau isif, are mogo isil, anī bun, ā firagagaū yeī, āgenei fonō fonō yeif. Ā aya mugu utornagauf. Anī ere, aya mugu sã, ere nigin, neu Dei ī aya ado.

³³“Ā aya bun wauī inosiya adouf nigin, od enei arokeneim. Tenebur ein ā morō adouf, anī ere, totoo adouf! Aya teneub enei nē megeir mogo wal afen.”

Jesus Yogo Nigin Kosē Yen

17 ¹Jesus od enei wogō yel fen, saa ilun itad fen, kosē yen: “Dei, naa mogo isil, fula fiya medeīya ō Naal wenē, ago di, ō Naal ō selī kulō fouf. ²Are ō Naal, idi ganan ō wenen bun, mata faimud ibodkeleya ifenēdiyof nigin, tamo kayau ganan lo fediya nē megeir ō wenen. ³Mata faimud ibodkeleya are yeir, ō momoi Negur tekelei ado Jesus Kristus ō sur won anī, idi keleī youf anī. ⁴Kabī ō wanan anī adikelen bunem, tenebur ein aya ō bun fula fiya medeīya arou asin. ⁵Dei, teneub kare fiya sã mog, ada urom fula fiya medeīya adon anī, ō malā bun fula fiya medeīya anī gama wana.

Jesus In Dō Fiya Tar Nigin Kosē Yen

⁶“Aya teneub enei bun tamal ō wanan idi bun, ō yaor ayon. Idi ogon, anī ere, ō idi wanan, ago di, idi ogon od dō difedig. ⁷Gama idi keleī, ereb ereb ganan aya wanan are ō bun tamal. ⁸Aya od wanan anī afenēdi di, idi dalen. Aya ō bun tamal asin anī, idi momoi bagai kelein, idi onom aya sur wiyan anī momoi den. ⁹Aya idi nigin kosē auf. Aya teneub enei nē tamo kayau nigin to kosē auf, anī ere, idi ō wanan anidi nigin kosē auf, ere nigin, idi ogon. ¹⁰Neu ganan are ogon, ogon are neu. Idi bunem, aya fula fiya medeīya alel. ¹¹Aya tenebur ein to abodōf, anī ere, idi fau tenebur dibodok, aya ō gein esef. Dei Fateul, ō yanā wanan nē megeir bunem, kulatun wediyof, anī bunem, ada tekelei gen idig tekelei youf. ¹²Sain aya idi geid mabodon, ō aya yanā wanan anī bunem, kulatun afeid el afen. Taka to fō yelen, tamo ī fō yalauf nē dogol fō yelen, are Negur nē Itotoya kisi falauf nigin.

¹³“Gama aya ō gein esef, neu kulīya idi namedin barikāf nigin, tenebur ein fau abod ken, od enei arok. ¹⁴Aya ogon od afenēdi di, teneub enei nē tamo kayau idi kiwai difenēdin, ere nigin, gama aya teneub enei nē sã, age fiya gen, idig teneub enei nē sã. ¹⁵Aya teneub enei bun tamal walelnēdiyof nigin to kosē auf, anī ere, wadāgen tamo sane isi fen, daū fediya nigin, kulatun wediyof anī kosē auf. ¹⁶Aya teneub enei nē sã, age fiya gen, idig teneub enei nē sã. ¹⁷Momoi bunem fateul unenēdiyof, ogon od are momoi. ¹⁸Ō tenebur ein sur wiyan gen, ayag teneub enei bun sur afiyēdin. ¹⁹Idi nigin, aya yug adok bagai afonok, are idig momoi bagai dogo adok Negur difenēf nigin.

Jesus Momoiya Tamo Kayau Ganan Nigin Kosē Yen

²⁰“Aya neu kosēya are idi nigin dogol sã, idi neid od bunem, aya nigin momoi douf anidi nigineg, aya kosē auf, ²¹idi ganan tekelei youf nigin kosē auf, Dei ō aya bun ubodok, aya ō bun abodok gen, idig ada bun dibodō di, teneub enei nē tamo kayau, onom aya sur wiyan anī, momoi douf nigin. ²²Fula fiya medeīya ō wanan anī, idi afenēdin, are ada tekelei gen, idig tekelei youf nigin. ²³Aya idi bun, ō aya bun, are idi tekelei youf nigin, anī bunem, onom aya sur wiya fen, aya nigin waū laa fedig gen, idi nigineg waū laa fedig anī, teneub enei nē tamo kayau keleī youf.

²⁴“Dei, idi ō aya wanan anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sã mog, ō aya nigin waū laaf fen, wanan anī.

²⁵“Dei madur bagai, teneub enei nē tamo kayau idi ō keleī sã, anī ere, aya ō keleī, neu dō fiya tar idi, onom aya sur wiyan anī keleī. ²⁶Aya ō anī afelnēdi di, idi ō keleī, ō nigin fau fau afelnēdif alauf, are ō aya nigin waū laa fiya anī, idi bun ibodōf ado, ayag idi bun abodōf nigin.”

Jesus Dirounen

(*Matyu 26:47-56; Mak 14:43-50; Luk 22:47-53*)

18 ¹Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakā kabī taka ibodon, ī yogon dō fiya tar geid, kabī atu dilen.

²Kiwai tamo Judas ī modoū anī keleī, ere nigin, sain musei Jesus in dō fiya tar geid an guru difedig. ³Anī nigin, Judas, kusī tamo tunī ado, tempel lo fiya tamo tunī pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusī nē waila guri de fen, dilen.

⁴Jesus, ī bun wō youf anī ganan kelein, ī iyok ile to fedin, “Ā ai umirnēgef?”

⁵Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren. ⁶Sain Jesus iron, “Aya im,” ye di, idi soso de dile, tenebur kuku den.

⁷Jesus baban idi to fedin, “Ā ai umirnēgef?”

Idi diron, “Jesus Nasaret tamal.”

⁸Jesus iron, “Aya ā arokeneim, aya im. Aya anī umirnagauf are, tamo eneidi utornēdig len, dile.” ⁹Agef iron are, od Jesus wogō yen anī kisi falauf nigin, “Aya ō wanan anidi taka to folō afelen.”^o

¹⁰Age dife di, Simon Pita ī, dimig adon anī ul feis yale, pris neid mudur nē ferfer weder biya melem salōf iran. Ferfer anī yana Malkus.

¹¹Age fe di, Jesus Pita irokenen, “Ogon dimig yogon modoū bun kel uno! Dei aya naan kap ifanan anī, aya to āf de?”

Jesus Anas Garan Dirou Dilen

¹²Age ye di, kusī tamo, nedi mudur, Juda neid tempel lo fiya tamo geid, Jesus dalen. Idi ī difo ken, ¹³Anas garan ket dirou dilen, Anas ī, Kaiafas ne ten, yar anī bun Kaiafas ī pris neid mudur ibodon. ¹⁴Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(Matyu 26:69, 70; Mak 14:66-68; Luk 22:55-57)

¹⁵Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofomalan kau namen dilen. ¹⁶Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

¹⁷Kabī kayau bobog lo fedig ī, Pita to fiyen, “Ōg be, in dō fiya tamo taka anī sā de?”

Pita iron, “Aya sā.”

¹⁸Menig nigin, ferfer, tempel lo fiya tamo geid, yā kū de fen, salili de, bouweid diroron. Pita īg weim difar fen, bouwa ironon.

Pris Neid Mudur Jesus To Fiyen

(Matyu 26:59-66; Mak 14:55-64; Luk 22:66-71)

¹⁹Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

²⁰Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun. ²¹Ere

^o 18:9 Jon 6:39

nigin anī aya to wiyaf? Idi aya wogō au di, karī difiyan onou idi to wiyēid. Ereb aya wogō aun, idi keleī.”

²² Jesus age ye irō di, tempel lo fiya tamo taka non ifaren anim, Jesus wala fāf fen, iron, “Pris neid mudur anī, ō ago urokenēdig de?”

²³ Jesus solof irokenen, “Aya ereb kū fenēya arom are, ō ereb kū fenēya anī urōf. Anī ere, aya momoi arom are, ere nigin ō walau fā wol?” ²⁴ Age ye di, Anas Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(Matyu 26:71-75; Mak 14:69-72; Luk 22:58-62)

²⁵ Simon Pita bouwa irorouk ifar mog, idi ī to difiyan, “Ōg be, in dō fiya tamo taka anī sā de?”

Ī waf fen, iron, “Aya sā.”

²⁶ Pris mudur nē ferfer taka, ī Pitam weder salōf iran nē sirag anim iron, “Aya ō ī urom kabier to ailiyeim de?” ²⁷ Pita baban waf mog, kaisā bagai tataro kokorok yen.

Jesus Pailat Mala Bun Ifaren

(Matyu 27:1, 2, 11-31; Mak 15:1-20; Luk 23:1-25)

²⁸ Age fe di, Juda tamo, Jesus Kaiafas bun tamal dale dirou, Rom gawaman mudur nē fō bun dilen. Are bonimeī bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen.

²⁹ Anī nigin, Pailat idi gedin ulō yeis isi fen, to fedin, “Ere od ā tamo enei bou bun unogouf?”

³⁰ Idi solo de diron, “Ī lo wal fiya tamo sam are, amā ō gein to marou masim.”

³¹ Pailat idi irokenēdin, “Ā aug ī waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.” ³² Are Jesus ī naig be fe, laa fouf nigin wogō yen anī, kisi falauf nigin agef wō yen.

³³ Age de di, Pailat aaben kel ile, Jesus iweigne ken, to fiyan, “Ō Juda neid king de?”

³⁴ Jesus solof iron, “Ō ogon kisim od enei urok de, tunim be aya nigin ō dirokono?”

³⁵ Pailat solof iron, “Aya Juda tamo de? Ō ogon tamo kayaum pris odudug geid, aya bun dirousiyom. Ō ere taka tau agon?”

³⁶ Jesus iron, “Aya neu tano teneub enei nē sā. Aya neu tano teneub enei nem are, neu kabī tamo, Juda tamom aya to daleyauf nigin kuī dem. Anī ere, neu tano teneub enei nē sā.”

³⁷ Age ye di, Pailat Jesus irokenen, “Age fouf, ō king de?”

Jesus solof iron, “Ō ogo yer urok, aya king. Enei nigin aya wō aun, are momoi anī wogō auf nigin, anī nigin, aya tenebur asin. Momoi nē ganam, aya karī difiyadig.”

³⁸Pailat to fen, “Ere anī momoi?” Age yel fen, ī baban Juda tamo gedin serē ile, idi irokenēdin, “Aya ī bun mosor taka to ailef. ³⁹Anī ere, āgenei tobonuneī eig fiya, Pasa naa bun, kalabus tamo taka aliskeneīdig. Ā Juda neid king aliskeneīf anī oroyeik de?”

⁴⁰Idi baban diweig, solo de diron, “Sā, ī sā! Barabas anī wanamāf!” Barabas ī anī bē tamal.

Pailat Jesus Aa Tetek Bun Dūf Nigin Iron

19 ¹Age de di, Pailat Jesus yale fen, irō di, wagī difiyen. ²Kusī tamo malū duri ado dale, teter tanak kori de fen, ī mudur bun kurū difiyen. Idi gabar kadaū dale difounne ken, ³idi baba baban ī wagen dile fen, diron, “O Juda neid king gai gai ibodōf!” Age de fen, wala fā difen.

⁴Pailat baban serē kel isi fen, Juda tamo irokenēdin, “Ulegef, aya ī bun mosor taka to ailef anī, ā keleī youf nigin, ī ā gein arou asif.” ⁵Sain Jesus malū duri kurū difiyen, gabar kadaū difounnen ado, serē isi di, Pailat idi irokenēdin, “Tamo are yeir!”

⁶Pris odudug, tempel lo fiya tamo geid, ī dile fen, diweig diron, “Aa tetek bun ūf! Aa tetek bun ūf!”

Anī ere, Pailat idi irokenēdin, “Ā aug waleg, aa tetek bun ūg. Aya ī bun mosor taka to ailef.”

⁷Juda tamo idi solo de diron, “Amā nemā lo ado, lo anī kilei ī laa fouf, ere nigin, ī yogo aya Negur Naal yedig.”

⁸Od enei Pailat karī ye fen, fatuk bagai kumī yen. ⁹Ī baban fō aaben kel ile fen, Jesus to fiyen, “Ō nain tamal?” Anī ere, Jesus aiten to yalen. ¹⁰Pailat Jesus irokenen, “Ō aya od to urokanauf de? Aya ō kafī fiya bun tamal yalelnōya nigin megeir ado, ō aa tetek bun inōya nigineg megeir ado anī, ō keleī sā de?”

¹¹Jesus solof iron, “Ilun tamal megeir ō to ifonom are, aya ogon megeir farumen to abodom. Anī nigin, tamo taka ī aya ō imā bun inenan, ī yogon mosor odug bagai, ogon wal fiya.”

¹²Jesus Pailat age fiyē di, Pailat Jesus kafī fiya bun tamal yalishēf nigin, naab imiren, anī ere, Juda tamo idi diweig diron, “Ō tamo enei utornē di, ilauf are, ō Sisa^p nē mou sā. Taka ī yogo anī king yef, ī Sisa kiwai ifenek.”

¹³Pailat od enei karī ye fen, Jesus serē yale irou isi fen, es fiya tamo nē sia, Meein Bedu dedig modoū bun ibodon (Meein Bedu are, Hibru od nem yana Gabata). ¹⁴Naa are Pasa Sifa nigin dodok fiya naa, gaa atun age fiya, naa anī ilele di, Pasa naa wō youf.

Pailat Juda tamo idi irokenēdin, “Āgenei king yeir.”

¹⁵Anī ere, idi diweig diron, “Uru uraile! Uru uraile! Aa tetek bun ū!”

^p 19:12 Rom neid king odug.

Pailat to fen, “Aya āgenei king aa tetek bun aũf de?”

Pris odudug solo de diron, “Amā king taka sã, Sisa dogol.”

¹⁶Anĩ nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(*Matyu 27:32-44; Mak 15:21-32; Luk 23:26-43*)

Anĩ nigin, kusĩ tamo Jesus dalen. ¹⁷Ĩ yogon aa tetek faali fe, modoũ Mudur Tuwan (Hibru od nem Golgota dedig) iselen. ¹⁸An idi Jesus aa tetek bun dun, tamo uru idig, ĩ geid aa tetek bun didenen, idi urom si sitakã, Jesus atun.

¹⁹Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING. ²⁰Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibru od nem, Rom od nem, Grik od nem. ²¹Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

²²Pailat aitedin yale iron, “Ereb aya atoton, are de agef ibodõf.”

²³Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokõ feleya diwan.

²⁴Idi abob dirokenen, “Ada anĩ to serek tafouf, ada aisaĩ tara ken, aibem yalouf anĩ tailauf.”

Negur nẽ Itotoya eig ye irok anĩ kisi falauf nigin, agef wõ yen,

“Neu kolos idi atun foi difeid fen,
neu kolos meluk nigin aisaĩ diran.”^q

Anĩ nigin, kusĩ tamo idi enei age difen.

²⁵Jesus nẽ aa tetek sirin, Jesus sina, sina nẽ tura, Maria Kolopas aiwa, Maria Magdala tamal an difaren. ²⁶Sain Jesus mala irã, sina ado in dõ fiya tamo taka ĩ nigin wau laa fedig non difar mog, ileid fen, Jesus ĩ sina irokenen, “Kayau, õ naal yeir.” ²⁷Age ye fen, Jesus yogon dõ fiya tamo irokenen, “Enei ogon sinã.” Naa anĩ bunem ilen, dõ fiya tamo enei sinawau yale, yogon fõ bun iroule, kulatun fiyen.

Jesus Laa Fen

(*Matyu 27:45-56; Mak 15:33-41; Luk 23:44-49*)

²⁸Anĩ dumen, Jesus keleĩ, erob erob ganam mogo gama bure felel, Negur nẽ Itotoya bun ibodok anĩ kisi falauf nigin, Jesus iron, “Aya naan ail fiyaf.” ²⁹Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon. ³⁰Jesus

^q 19:24 Sam 22:18

wain makik anī yale fen, iron, “Gama bure.” Age yel fen, guyu kureis, yogon uur itoron.

³¹Gama naa are dodok fiya nē, we fele di, are Sabat naa, Sabat anī are, uub odug. Juda tamo idi, Sabat naa bun, bouweid aa tetek bun ifareya ditorōdig, anī nigin, idi yeid weweur difeid, bouweid gei difalaisiyouf nigin, Pailat dirokenen. ³²Anī nigin, kusī tamo disin, tamo taka ket ye weweur difen, takag age difen, idi Jesus geid, aa tetek bun didenen anidi. ³³Anī ere, idi Jesus wagen disi fen, ī mogo laa fen anī dilen, anī nigin, idi ī ye to weweur difen. ³⁴Anī fotokar, kusī tamo takam, ot nem Jesus siri gilī fe di, naud naan ado fi felen. ³⁵Tamo enei ilen im wogō yen, yogon wogōya are momoi, ī keleī, ī momoi wogō yef, are āg momoi gouf nigin wogō yef. ³⁶Negur nē Itotoya enei kisi falauf nigin agef wō yen, “Yogon tuwa taka to were fouf,”^r ³⁷agef fen, Negur nē Itotoya takag irok, “Idi siri gilī difen tamo ī, idim dilouf.”^s

Jesus Mū Difen

(*Matyu 27:57-61; Mak 15:42-47; Luk 23:50-56*)

³⁸Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, iminēyan Jesus dō fen. Pailat yo ye di, ī isi, Jesus bouwa yalen. ³⁹Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya. ⁴⁰Idi urom Jesus bouwa dale, marasin ado gabar lalau nem filu difen. Juda neid tamo mū fiya tobonunā bunem age difen. ⁴¹Jesus aa tetek bun dun nē modoū an, kabī taka ado, kabier an, ku mata taka ado, taka an to goro difen. ⁴²Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

Matmat Gorō Ibodon

(*Matyu 28:1-8; Mak 16:1-8; Luk 24:1-12*)

20 ¹Uub nē naa matu Sande bun, bonimeī bagai gugum ado, Maria Magdala tamal matmat bun ile fen, mala irā, bobog bun meein yaleleya ilen. ²Anī kayau, Simon Pita, dō fiya taka Jesus ī nigin wau laa fedig anidi gedin gudu ref ile, irokenēdin, “Idi Odug matmat bun tamal dale diroulen, ī nain be dinon, ada keleī sā!”

³Anī nigin, Pita, dō fiya tamo taka ado, matmat bun dilen. ⁴Urom gududu den, anī ere, dō fiya tamo takam Pita wal fe, ī ket matmat bun wō yen. ⁵Ī iti ken, fai yen, gabar lalau filu difen anī an yen mog, ilen, anī ere, ī kuren to ilen. ⁶Age fe di, Simon Pita dum dō fiyen, wō ye fen, tokō

^r 19:36 Eksodas 12:46; Namba 9:12; Sam 34:20 ^s 19:37 Sekaraia 12:10

fel, matmat kuren ile, gabar lalau filu difen an yen mog, ilen, 7mũ difen gabar Jesus mudur sile difen anĩg ilen. Mudur sile difen gabar are, yogo fire kori fel, gabar lalau filu difen anĩ firen ibodon. ⁸Age fe di, dõ fiya tamo taka, ĩ ket matmat bun wõ yen ĩg, kuren ilen. ĩ ile fen, momoi yen. ⁹(Jesus laa bun tamal kel fã youf ya, Negur nẽ Itotoya bun yenek anĩ, idi fau wedereid fokõya sã.)

Jesus Maria Magdala Tamal Bun Wõ Yen

(*Matyu 28:9, 10; Mak 16:9-11*)

¹⁰Age de fen, dõ fiya tar, nedi fõ bun ke de dilen. ¹¹Anĩ ere, Maria matmat serẽ inã yalef ifaren. ĩ inã ado inã ado iti ken, matmat namen fai yen. ¹²Agef fen, ĩ, engel uru kolos lalau adodo, Jesus yenen modoũ bun dibod mog, iledin, taka muduren, taka yen.

¹³Idi ĩ to difiyen, “Kayau, õ ere nigin inã walef?”

Maria iron, “Idi neu Odug dale diroulen, ĩ nain be dinon anĩ, aya keleĩ sã.” ¹⁴Age ye fen, ĩ falei yel, Jesus an ifar mog ilen, anĩ ere, are Jesusem ya anĩ to kelein.

¹⁵Jesus iron, “Kayau, õ ere nigin inã walef? Õ ai anĩ umirnek?”

Maria kisi fen, ĩ kabĩ lo fedig anim ye fen, irokenen, “Tamo biya, onom ĩ wale uroulen ouf are, nain be unon anĩ, aya urokana di, aya ĩ alouf.”

¹⁶Jesus ĩ irokenen, “Maria.”

Maria ĩ falei yel, Jesus wage ifen ken, Hibru od nem irokenen, “Raboni!” (anĩ nẽ gariya, Tise).

¹⁷Jesus iron, “Aya to urouna, ere nigin, aya Dei gein fau kel iseleya sã. Anĩ ere, neu turau tar gedin ule urokeneĩd, ‘Aya neu Dei, āgenei Temeĩ, neu Negur, āgenei Negur bun kelau eselauf.’ ”

¹⁸Anĩ nigin, Maria Magdala tamal, in dõ fiya tar gedin ile irokenẽdin, “Aya Odug ailel!” Age ye fen, Maria Jesus od enei irokenen anĩ, idi wogõ fiyẽdin.

Jesus In Dõ Fiya Tar Meleid Bun Wõ Yen

(*Matyu 28:16-20; Mak 16:14-18; Luk 24:36-49*)

¹⁹Uub nẽ naa matu Sande aragau anĩ bun, Jesus nẽ dõ fiya tar, Juda tamo nigin kumĩ de fen, sukar kotũ difel, aaben guru de dibod mog, Jesus isi, idi atun ifar fen, iron, “Wau inosiya ã ado ibodõf!” ²⁰Od enĩ irokela fen, ĩ ima siri ado idi ifelnẽdin. In dõ fiya tar idi, Odug dile fen, fatuk bagai kulĩ den.

²¹Jesus baban iron, “Wau inosiya ã ado ibodõf! Dei aya sur fiyan gen, ayag ã sur ayeik.” ²²Age ye fen, idi bun fuu fiyeĩd fen, iron, “Awa Uur Fateul waleg. ²³Ã, tamo neid mosor nigin, wedereĩ tu kalauf are, idi neid mosor nigin weder tu kelef, ã idi neid mosor nigin, wedereĩ to tu kalauf are, idi neid mosor nigin weder to tu kelef.”

Jesus Tomas Mala Bun Wō Yen

²⁴Anī ere, Jesus in dō fiya tar meleid bun wō yen sain, tuwelf idi neid taka Tomas (yana taka Didimus), idi geid to ibodon. ²⁵Anī nigin, dō fiya tar tunim ī dirokenen, “Amā Odug mailen!”

Anī ere, ī idi irokenēdin, “Aya yogon ima bun tuti ba to ailauf, aya imau gege tuti ba bun to ano fen, aya imau siri bun to anouf, aya to momoi auf.”

²⁶Uub tekelei ilele di, in dō fiya tar baban fō bun dibodon, are Tomas geid. Sukar kotū difedin, anī ere, Jesus isi, idi atun ifar fen, iron, “Wau inosiya ā ado ibodōf!” ²⁷Agef fen, Jesus Tomas irokenen, “Ogon imā gege ein uno, neu imau uleid. Imā urā siru bun uno. Waū to ilef isif fouf, momoi dogol wo.”

²⁸Tomas Jesus irokenen, “Neu Odug, neu Negur!”

²⁹Age ye di, Jesus Tomas irokenen, “Ō malam aya uleyaf nigin, momoi wof. Idi meledim to dile fen, momoi def, are el fedif.”

³⁰Jesus, in dō fiya tar meleid bun, memelik musei inodin, are buk enei bun itotoya san. ³¹Anī ere, Jesus ī Kristus, Negur Naal anī ā momoi ge fen, ī yana nigin momoiya bunem, ā mata walogouf nigin enei itoton.

Jesus Gau Yaleya Bun Memelik Inon

21 ¹Anī dum, Jesus baban in dō fiya tar gedin, Taiberias daliyount^t wō yen. Anī eig fe wō yen. ²Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon. ³Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anī idi dile, waag bun sosō den, anī ere, bō anī bun, gau taka to dalen.

⁴Bonimeī bagai, Jesus maaī yerin ifaren, anī ere, dō fiya tar idi, Jesusem ya anī to kelein.

⁵Ī idi iweig irokenēdin, “Mou tar, ā gau taka tau walegel?”

Idi aiten dalen, “Sā.”

⁶Ī irokenēdin, “Waag siri biya melem kakāg urāg fen, tunī gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷Anī in dō fiya tamo Jesus ī nigin wau laa fedig ī, Pita irokenen, “Are Odugem!” Ī, “Are Odugem,” ye di, Simon Pita karī ye fen, ī kolos teten tamal inū inon anī yale, luwa guf fen, naanū ifū iran. ⁸In dō fiya tar tunī ganan, waag bun disi, kakāg gau isokosen ado dī de dilen, ere nigin, are idi daliyou yeri gerō sā, handred mita age fiya. ⁹Sain idi kutū desin, yā kaureya anī bun, gau yā bē bret tunī ado dilen.

¹⁰Jesus idi irokenēdin, “Ā gau gama bagai walegel tunī urousig.”

^t 21:1 Yana taka are Galili Daliyou.

¹¹ Simon Pita waag sō ye fen, kakāg dī falaisi, maaī yerin irousin. Kakāg are gau odudug isokosen, gau are 153, gai musei biya, anī ere, kakāg to kokour fen. ¹² Jesus idi irokenēdin, “Usig, saaf wōg.” In dō fiya tar kukī de fen, takam ī to, to fiyen, “Ō aim?” Idi keleī, are Odug yogo. ¹³ Jesus isi, bret yale fen, idi ifenēdin, gaug de age fen. ¹⁴ Jesus laa bun tamal kel fā ye fen, in dō fiya tar meleid bun wō yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, ō aya nigin fatuk waū laa fef, tunī eneidi neid wal fiya de?”

Pita iron, “Odug, momoi, ō keleī, aya ō nigin wau laa fef.”

Jesus iron, “Neu sipsip momou ufoutneīd.”

¹⁶ Baban Jesus iron, “Simon Jon naal, ō aya nigin waū laa fef de?”

Pita solof iron, “Odug, momoi, ō keleī, aya ō nigin wau laa fef.”

Jesus iron, “Neu sipsip kulatun wiyēdiyof.”

¹⁷ Jesus Pita iroken towo fe fen, iron, “Simon Jon naal, ō aya nigin waū laa fef de?”

Pita wau moron, ere nigin, Jesus ī to fiyē towo fen, “Ō aya nigin waū laa fef de?” Pita iron, “Odug, erēb erēb ganān ō keleī, ō keleī, aya ō nigin wau laa fef.”

Jesus iron, “Neu sipsip ufoutneīd. ¹⁸ Aya ō momoi bagai arokonok, sain ō gaun, ō naki rel, ogon oroya dō fen uledig, anī ere, sain ō tubau bun, imā walese di, taka nem ifōyo ken, ō to oroyok nē an irouleyōf.” ¹⁹ Pita naig be fe, laaf fen, Negur fula fiya medeīya ifenēf anī nigin, Jesus od enei iron. Age ye fen, Jesus Pita irokenen, “Aya dō wiya!”

²⁰ Pita falei yel fen, dō fiya taka Jesus ī nigin wau laa fedig anī, dō feid mog, ilen. (Tamo enei bō saaf yōya bun, Jesus akoron mudur isen ken, iron, “Odug, aim anī ō kiwai ifonōf?”) ²¹ Sain Pita tamo anī ile fen, Jesus to fiyen, “Odug, tamo enei ī naig foug?”

²² Jesus solof irokenen, “Tamo enei mata ibod mog, aya kelauf anī aya orouf aufeg, ō nigin ere yok? Ō de aya dō wiyauf.” ²³ Enei nigin, dō fiya tar idi atun, od enei iyokelen, are dō fiya tamo enei to laa foug den. Anī ere, Jesus, tamo anī to laa foug ya nigin to iron, Jesus ī eig ye iron, “Tamo enei mata ibod mog, aya kelauf anī aya orouf aufeg, ō nigin ere yok?”

²⁴ In dō fiya tamo enei, anī ganān wogō ye fen, itoton. Amā keleī, in od are momoi.

²⁵ Jesus ī erēb erēb museig age fen. Aya kisi afef, anī ganān buk bun ditotlem are, teneub ganān bun modōū sam.